



## الإهداء :

إلى الذين أنتظروا وطال إنتظارهم أهديكم روايتي التي كُتبت خصيصاً لكم  
وأقول : أتم تحملت الكثير ولم يُسمح لكم بالسعادة ولم تتح لكم فرصة  
وزرعت في أرض لم تحصدوا منها إلا الحزن والبكاء ف أبشروا إن متاعكم لم  
تُزرعوا به بعد ، وأعلموا أن شمسكم ستضيء العالم وستذيب جليد قلوبكم  
وأعلموا أني أحبكم أيها الأتقياء  
أقدم لكم هذه الراوية عليها تصبح أو تكون سبب في سعادتكم أو جزء منها  
علي الأقل

عمرو جمال

# ( جميلة أكتوبر )

## الفصل الأول

في صباح يوم الأربعاء استيقظت الفتاه صاحبه ال ٢٥ عام علي أصوات المطر الخفيف التي تضرب شرفة غرفتها فقامت تنظر من الشرفة متأمله ل تغير لو بسيط في أشكال البنايات والشجر او السحاب أو حتى وجوه السائرون في طريق الحياه من رجال ذاهبون ل اشغالهم ومن أطفال ذاهبون الي مدارسهم ولكن لا يوجد تغير فتنظر الي السماء وتتنفس حتي تملئ رئيتها وتطلق زفير يخرج معه كل ضيق في نفسها وتقول "يوم جديد فرصة جديدة"-أنا نازلة ياماما عايزة حاجة

- لأ يا حبيبتي تسلميلي ابقى خلي بالك من نفسك المطر شديد اليومين دول

- متقلقيش انا مش هتأخر أساساً المشوار ده علطول وجاية

ومن زجاج السيارة تنظر الي الجهة المقابلة ل الطريق وتتأمل الطرقات والشوارع والبشر... لطالما كانت يشد انتباهها الأشياء الغير عادية الأشياء البسيطة بالنسبة ل الآخرين كانت تحب التفاصيل الصغيرة وهذا منذ صغرها كانت طفلة مختلفة عن الآخرين لا تهتم بما يهتم الأطفال فى سنها حين كانوا يلعبون ولا يفكرون الا باللعب كانت هي تجلس وتتأمل فى الطبيعة الشجر والسحاب والقمر والحشرات الصغيرة وأحيانا فى وجوه البشر كانت فريدة ومميزة من جهة وانطوائية ومنغلقه من جهة أخرى كانت تري الراحة والأمان بعيد عن البشر وبعيداً عن الضوضاء التي يحدثها العالم كانت تحب الأماكن ذات المساحة الخضراء وتعشق البحر والوقوف أمامه كانت تهرب من ثقل العالم الي البحر كانت ترى فى البحر انعكاس لها فى عمق البحر واختلاف الأصناف الكثيرة داخله كما هو حال روحها ف بداخلها الكثير مما لا تعرفه هي نفسها... وفى ظل انغماسها فى التفكير اذا بها يقطعها صوت يسألها :

- يا أستاذة انتي هتنزلي هنا عشان احنا وصلنا العنوان حضرتك!

- تمام شكراً

دخلت المطعم وجلست على الطاولة المعتادة فى انتظار صديقتها نورهان والتي كانت قد طلبت مقابلتها اليوم ل مناقشة أمر طارئ وفى انتظار صديقتها اذا بها تتلقى إتصال من نورهان ف ترد وتقول لها :

- معلىش ياروحي انتي فين؟ هو انتي فى المطعم وصلتني؟

- ايوة انا فى المطعم اهو وقاعدة مستنياكي!

- طيب معلش سامحيني بس انا حصلي ظرف ومش هقدر أجي انهاردة والله  
معلش

.....

- طيب تمام يانور هان مفيش مشكلة انتي حصل عندك حاجة طيب؟

- لأ متقلقيش مفيش مشكلة انا هعوضها لك بعدين يلا سلام!

قفلت معاها وهي جواها حاجة عايزة تطلعها... اللي هو انتي ازاي ترجعي  
في كلامك ومتجيش بعد ما خلتي اجي في المطر والجوده... وانا ليه  
مقدرتش اقولك كده ليه سكت وانا مضايقة منك دلوقتي!

لطالما كانت نطقة ضعفي الوحيدة اني مش بقدر أواجه الأشخاص، اللي جوايا  
مش بقدر اطلع مبقدرش أعبّر علي اللي في نفسي بفضل أشيل جوايا!

فقامت ل الخروج من المطعم وعندنا خرجت رأّت ان السماء تطمر بغزارة  
شديدة وان الناس تجري مسرعة في الطريق لكي يحتمو من المطر في اي  
مكان... فتذكرت نصيحة والدتها ب "تخلي بالها من نفسها" ولكن هناك شيء  
داخلها يدفعها ل الخروج تحت المطر مباشرة وأن تمشي في حين ان لا بشر  
آخر يمشي ف هذا يعطيها شعوراً بالتميز والحرية وكادت ان تخطي أولي  
خطواتها في الطريق ولكنها سمعت صوت خلفها يقول لها

- "انتى بتعملي ابيه يابنتى"

فنظرت خلفها ليس لكي توبخ من اوقفها من عن خطوة الحرية الخاصة اللي كانت ستخطوها، بل لتعرف ب أستنكار...

- بنتي؟!!

- انتي بتعملي ابيه دلوقتي؟ انتي رايحة تمشي في عز المطر في الطريق والجو ده؟!!

- انت مين معلىش عشان توقفني؟!!

عندما يتعلق الأمر ب الحرية الصغيرة والتفاصيل الخاصة بها ومحاولة أحدهم باقتحامهم تكتسب قوة مجهولة المصدر داخلها تواجه بها بشراسة وبجراحة

- انا مش قصدي حاجة انا بس لقيتك ماشية ورايحة ل الطريق حسبك مش واخدة بالك قلت أحذرك

- لأ أنا واخدة بالي أنا بعمل ابيه كويس

.....

وقامت ماشية وسايبة الشخص الغريب المفتحم عليها ده وهي مضايقة اكثر واكثر بسبب صاحبته اللي اخلفت معاه الميعاد المتفق وهي اكره ما عليها عدم التزام بالمواعيد... وثانيا هذا الشخص اللي ادخل في لحظة مش بتاعته خالص لأ وكمان بيقولي "يابنتي" هو شايفني طفلة يعني ولا ابيه ده انا شكلي اكبر منه كمان!

ورجعت البيت ودخلت تنام وهي عندها طقوس كل يوم بتعملها قبل ما تنام  
انها بتكتب الأحداث المهمة اللي حصلت لها فى اليوم وتشوف ابيه اللي كانت  
عايزة تعمله ومعرفتش عمله وتحاول تعمله اليوم اللي بعده وذكرت الموقفين  
بتوع اليوم وجت وهي بتكتب "وقابلت شخص وقفني وقالى يابنتي"  
قعدت تفكر هو ليه قالى كده هل هو بالفعل كبير عني الفرق ده ولا هو شاف  
انى صغيرة فى السن لدرجة يقولى يابنتي!  
بعدها قفلت الصفحة وغمضت عيونها وقالت مش مستهلة تفكير أساساً بكرة  
تكون فرصة جديدة ان شاء الله اعمل اللي مقدرتش اعمله انهاردة... ودخلت  
تنام وهي مش عارفة ابيه اللي مستخلي لها بكرة واللي ممكن يغير نمط  
حياتها كله ويكون بكرة "يوم جديد"

## الفصل الثاني

وفي الصباح الباكر استيقظت صغيرتنا وهي تشعر بالضيق من شيء لا  
تتذكره ربما حلم سيئ ربما موقف معين لا تعرف ولكنها استيقظت متعكرة

المزاج ف خرجت ل والدتها لتجهز معاها الإفطار فوجدت ان لا أحد في المنزل على غير العادة في الصباح الباكر والدها يكون في العمل واخوتها يكونوا في المدارس ويبقى أخيها الصغير لؤي صاحب ال ٥ سنوات مع الأم ولكنها لم تجد احد غيرها ف اتصلت ب أمها لترى أين ذهبت

- ماما انا صحيت من النوم ملقتش حد

- معلىش يا حبيبتي كان عندي مشوار مهم لازم اروحه

- مشوار مهم؟! الساعة ٩ الصبح و واخده لؤي كمان معاكي

- معلىش يا حبيبتي لما أرجع هفهمك مش هتأخر انا جهزتلك الفطار لو هتفطري وتنزلي الشغل

- تمام ياماما خلي بالك من نفسك

وبعد ما انتهت من الإفطار كانت تتجهز ل النزول اذ بها تنظر إلى (مشمش) القط الشيرازي الذي كان يلعب بالكرة وينظر إليها لكي تلعب معه ولكنها قالت له

- معلىش يا مشمش بس انا لازم انزل انا مش عارفة هسيبك ازاي هنا لوحدك؟!!

وكانت نظرات مشمش كفيلة أن تحسم قرارها وتقول

- تصدق بقى والله لاخذك معايا الشغل واللى يحصل يحصل

وهو على كتفها يلعب وهي جالسة أمام الكمبيوتر الخاص بها وهي تعمل  
وتتابع عملها اذ ب زميلتها تقول لها وهي تضحك

- ابيه ده انتي جبتي القطة بتاعتك معاكي شكلها كيت اوى

- أيوة صحيت مكنش في حد في البيت ومكنتش هقدر اسيبه لوحده بيخاف،  
واهو بيشتغل معايا وبيهون عليا شغلي

- بس يعني محدش اعترض عليك انك تدخل في حيوان الشغل كده

- لأ انتي عارفة انا هنا بتعامل معاها ازاى وهما بيحترموني ومش هيقفو  
معايا على حاجة زي ديه

- يابختك ياستي الناس بتحبك ومحدش بيرفضلك طلب

- هو مش بخت علي قد ما انا بتقي الله في الناس وتعاملي معاها كويس  
وبحترمهم وبيحترموني بس يعني

- طيب ربنا يحب فيكي خلقه كمان وكمان ياخوشي!

وبالطبع أدركت المعنى الخفي لهذه الإبتسامة السخيفة من زميلتها التي تغار  
منها علي المعاملة الطيبة والاستحسان التي تلقاها من الناس وكانها تفعل  
شيء صعب او غريب!

أصبح الأصل هو المُستغرب ويُغار ويُنظر اليه؟

تقول في نفسها انا لم أفعل شيء مميز الا اني اتعامل مع البشر بطيبة وبما  
يرضي الله لم أفعل مثل باقي الأشخاص الذين يأذون ويجرحون ويتعاملو  
بتعالي وسوء مع الآخرين فقط لكي يكون لهم مكانة خاصة او ان يرتقو او  
ماشابه

واستغرقت في التفكير حتى انتشلها اتصال من والدتها وهي تقول لها

- انتي جاية امتي يا حبيبيتي؟

- كالعاده ياماما زي كل يوم يعني

- طيب متعرفيش تاخدي ساعة بدري وتطلعي؟

- عايزاني اخرج بدري ساعة! ليه ياماما طيب في حاجة حصلت!

- لأ مفيش حاجة انا بس بسألك عشان اشوفك هتلقني ولا لأ!

- الحق ابيه ياماما؟

- أصل احنا عندنا ضيوف دلوقتي وانا كنت عايزاكي تقابلي طنط عشان هي

الصراحة نفسها اشوفك

- طنط مين ياماما اللي بتتكلمي عنها ديه؟! وعايزة تشوفني ليه؟

- خلصي بس مش مهم الكلام على التليفون اول ما تخلصي بس اديني رنة  
متنسيش يلا سلام

وقفلت معاها وهي مستغربة ... طنط مين ديه اللي عايزة تشوفني وعايزة  
تشوفني ليه!

وبعد يوم عمل اخدت مشمش ورجعت البيت وهي قدام الباب لقت جزمة ل  
ست ولما دخلت سلمت على أمها ولقت ست غربية قاعده مع امها بتبتسم  
وبترحب بيها بكل حب وبتقول

- بسم الله ماشاء الله تبارك الله عاملة ابيه يا جميلة

- الحمد لله كويسه ياطنط

- انا اسمي نادية انا بكون زميلة ماما كنا مع بعض في المدرسة واحنا  
صغيرين بس انا سافرت مع اهلي وانا صغيرة وفضلت برة فترة كبيرة ولما  
رجعت وعرفت ان ماما ساكنة هنا قلت اعدي عليها عشان كانت وحشاني  
واشوف اولادها وبسم الله ماشاء الله مكنتش اعرف انها عندها بنت زي القمر  
كده

- ربنا يخليكي ياطنط والله ده من ذوقك، انا هدخل طيب اغير هدومي ياماما

- تمام يا حبيبتي

وعندما دخلت الي غرفتها وبدلت ملابسها وخرجت كانت زميلة امها قد رحلت فسألت امها

- هو صحيح ياماما هي طنط ديه كانت عايزة تشوفني ليه؟

- نادية ديه آخر مرة شفنا بعض كان من سنين كتيرة اووي قبل حتي ما اتجوز ولما عرفت عنواني جت تزورني علطول ولما عرفت اني عندي بنت فرحت اووي اووي وقالت لازم تشوفك بقي

- ايوة بس هي تفرح اووي ليه انك عندك بنت يعني غريبة ديه!

- انتي كل ده لسة مجمعتيش!

- اجمع ابيه

- نادية عايزاكي ل ابنها تكون عروسة ل ابنها الكبير

وهنا أحمر وجهها وتلعثمت وأدارت وجهها الجهة المقابلة وقالت فى خجل

- بس ياماما انا لسة صغيرة مش بدري شوية الكلام ده

- بدري ابيه انتي اللهم بارك اهو ٢٥ سنة عايزة تستني ابيه كمان؟! ثم ثانياً

بقي انا حددت معاد مع ابنها انه يجي لنا آخر الأسبوع نشوفه ويشوفنا!

- انتي بتتكلمي جد ياماما! أحر الأسبوع ابيه طيب انتي ليه مخدتيش رأيي  
مش يمكن مش فاضية او مشغولة

- يا حبيبتي انتي موراكيش حاجة وانا عارفة وانا اخترت يوم اجازتك من  
الشغل عشان تكوني فاضية كمان

- يووه ياماما عليكى بقى بتتصرفي دايماً ومش بترجعي ليا

- يا حبيبتي كله خير بإذن الله نشوفه ولو معجبكيش خلاص

- طيب ياماما اللي انتي شيفاه

ودخلت غرفتها تفكر وتقول ... هل انا مستعدة لخطوة مثل هذه هل انا جاهزة  
لكي اشترك في حياة شخص آخر وان اشرك شخص آخر في حياتي! هل  
سيوافق مع افكاري وشخصيتي أم سيراني معقدة وكئيبة

وتسائلات تدور في عقلها وكادت أن تغوص اكثر في البقعة المظلمة في  
نفسها حتي انتشلتها أمها ب حزن دافئ وضمتهما بين ذراعيها وتقول

- متقلقيش ياروحي متقلقيش من حاجة خدي الموضوع ببساطة خالص انا  
معاكي وفي ضهرك خليكى مطمئة

- انتي عرفتي منين اني قلقانة

- قلب الأم! قلبي قالي انك محتاجة دلوقتي حزن عشان كده جيت

- انا بحبك اووي ياماما ربنا مايحرمني منك يارب
- يلا بقى عشان تقومي تجهزي الغداء معايا عقبال ما بابا يجي

ومضى اليوم والثاني والثالث حتي أتى اليوم الموعود

وفي تمام الساعة الـ ٦ أتت الأستاذة نادية ومعها ابنها واستقبلهم الأم والأب ورحبو بهم حتي اتي ميعاد خروج الأنسة الصغيرة وهي في قمة التوتر خرجت وعينها في الأرض حتي رحبت بالضيوف وجلست ولم تنظر إلى الشاب الي الآن ولكنها تسمع صوته وهي تقول في نفسها "لقد سمعت هذا الصوت من قبل" وهنا حيث استجمعت الشجاعة حتي تنظر إلى الشاب اذا بها تتصدم وتجد ان الشاب الذي أمامها هو نفسه الشاب الذي منعها في اليوم الممطر من الانطلاق

ولما حان الوقت ان يجلس الشاب والبنت بيتكلمو قاموا جميعن ليتركو المجال لهم في الحديث وجلسو في مقربة منهم ابو الشاب وابو البنت بيتكلمو وهكذا ولما استجمع الشاب شجاعته في الحديث ليبدأ في الكلام قاطعته قائلة :

- أنت فاكرني؟

أبتسم الشاب ابتسامة خفيفة ثم قال

- زأنا أقدر أنساكي؟!!

- يعني فاكرني! طيب حلو وحضرتك عارف انك محتاج تعتذر ليا بقي  
صح؟!!

- اعتذر؟! ليه طيب هو انا عملت حاجة!

- ايوة عملت! انت حضرتك نسيت انك منعنتي اني امشي في الشارع والدنيا  
كانت بتمطر وندهت عليا ووقفنتي وقولت لي "يابنتي" هو انا شكلي كان  
صغير كده بالنسبة لك؟!!

ضحك الشاب ضحكة صغيرة وهو يقول :

- طيب انا دلوقتي عايز اعرف انتي زعلانة اني وقفنتك انك تمشي في نص  
الشارع اللي كان غرقان واللي كان فيه عربيات وكان ممكن عربية تخبطك  
ربنا يحميكي يعني ويحفظك ولا زعلانة اني قلتك يابنتي!

- انت بتضحك وبتتريق عليا!

- لأ والله أبدأ مش قصدي بس انا مستغرب بجد انتي زعلانة من ابيه تحديدا

- عشان قولتلي يابنتي ديه!

- طيب انا بعترتك اهو دلوقتي وبقولك اني مكنش قصدي أبداً اني أضايكك او  
اوقولك يابنتي اني بصغر منك لا والله انا قلتها عفوية يعني مش انك صغيرة  
ولا حاجة بس يعني ل الأمانة انتي اللي يشوفك بجد يقول بنوتة صغيرة  
ابتسمت فى خجل كده وقالت له

- طيب اعتذارك مقبول بس انا عندي أسئلة عايزة اسئلك

- اتفضلني أومري وانا تحت أمرك

- انت بتحب ربنا؟

استغرب الشاب من السؤال وقال :

- اييه السؤال الغريب ده! انتي عايزانى اقول لأ مثلاً

- لأ مش ده المغزى من السؤال، والسؤال واضح وانا عايزة إجابة عليه بعد  
اذنك!

- طيب انا بحب ربنا؟ إجابة السؤال ده مش بتتحاوب بكلمة ابوة طبعاً بحبه  
وازاي محبوش والكلام ده، لأ انا بحب ربنا يعني بعمل اللي هو قالي عليه  
اصل حبي لو كان ل شخص هيكون عبارة عن اييه؟ اعمل اللي هو بيحبه  
وابعد عن اللي هو بيكره وهاكذا بيكون حبي لله اني اعمل اللي هو أمرني  
عليه وابعد عن اللي هو نهاني عنه واكيد الحب ده من غير عمل أو أفعال  
ملوش لازمه بس يعني!

اتمنى اكون قدرت اوصل ل الإجابة اللي انتي عايزة تسمعها

- ايوه شكراً على الإجابة بتاعتك دلوقتي انت عايز تسألني حاجة

- لأ انا عايزك انتي اللي تسأليني تاني

اخذت الشابة نفس طويل ثم بدأت قائلة :

- طيب انا عايزة اقولك على حاجات عني عشان لو هتتقبلها تمام لو مش

هتعرف تتقبلها يبقى متعبش بعض تمام

- تمام اتفضلي

- بص انا شخصية انطوائية ومش اجتماعية انا بنزل اشتغل عادي بس مليش

معارف كثير، أصدقائي صغيرين مش كثير، بحب قعدة البيت بس مش بحب

اكون لوحدي برضو، انا شخصية صعبة في المعاشرة هتتعب معايا عشان انا

متقبلة المزاج اووي بعيط بسرعة وبتأثر من اي حاجة وعندي عيب رخم

**"اني باخد بالي من التفاصيل الصغيرة"** والتفاصيل ديه كفيلة انها تفضل

معكنة عليا يومي، انا عايشة في عالم انا مكوناه جوايا انا الوحيدة اللي عايشة

جواه لوحدي ومش عايزة ادخل حد العالم بتاعى وفي نفس الوقت مش عايزة

اقتحم حياه الآخرين انا متقبلة نفسى وحاطه حدود بيني وبين كل الناس وكل

حاجة الصراحة ... ف انت ابيه رأيك في الكلام ده؟ عندك استعداد تكمل بعد

اللي سمعته ده ولا غيرت رأيك؟

اخذ نفس عميق ملئ به صدره ثم أطلقه وقال :

- اقولك علي حاجة انا كنت طول حياتي حاسس بحاجة كانت نقصاني،  
في حاجة انا محتاجها بس مش عارف ابيه هي دايمًا بدور علي حاجة  
مش عارف أسمها كنت حاسس بفراغ جوايا مش عارف املاه مهما  
عملت كنت بحاول ادور علي حاجة الاقي بيني وبينها ربطة وصل أكل  
صحاب معارف خروجات فسح وصور كل دول حاولت اني أسد بيهم  
احساس الفراغ ده ومعرفتش لغاية ما في لحظة شفت ولقيتك في  
الشارع قدامي وانا خارج من الكافيه شفت عينكي وهي بتلمع شفتك  
وانتي ماشية مكنتيش شايقة حد في الشارع كنتي باصة ل السماء  
وبتبتسمي انا ساعتها حسيت اني لقيت اللي بدور عليه حسيت لأول  
مرة اني بقيت مرتاح بقيت مطمئن كنت عايش حياتي كلها في قلق  
وتعب من البحث من غير فايده عشان كده انتي مهما هتقولي انا  
معنديش أدنى مشكلة في أي حاجة فيكي ده بالعكس ده انا مبسوط اكثر  
اني بعرف عنك الحاجات اللي محدش هيعرفها غيري وبجد انا بتكلم  
من كل قلبي!

هنا سكتت الشابة من غير تعليق وأحمر وجهها ونظرت الي الأرض ولم تجد  
ماتقوله حتي استطاعت ان تقول :

- انت ابيه أمينتك اللي عايزة تحققها في الدنيا؟

- اني اتجوزك!

- طيب فلنترض الكلام ده قبل ماتقابلني كانت ابيه أمنيتك؟

- اني اقبالك!

- يوه، طيب انت اسمك ابيه؟

- اسمي تيم، وانت اسمك ابيه؟

- اسمي زُلفى

- اسمك جميل اووي

- خلاص بقى كفاية عمال تكسفني

- انا اسف مش قصدي بس بجد اسمك جميل اووي

- وانت كمان اسمك تيم جميل برضو

- لأ ده جمال عيونك انتي

وهنا كانت الضربة القاضية بالنسبة ل زُلفى فقررت ان تقوم وتذهب في المجلس وهي فى غاية الخجل من تيم وقال لها تيم بصوت خافت وهي ذاهبة "زُلفى أنتِ في قلبي"

ودخلت زُلفى غرفتها وقلبها ينبض ويكاد ينفجر من الخفقان ومن التوتر واذا بها ترى نفسها في المرآة فتجد نفسها تبتسم وبعدها دخلت عليها امها فقالت لها :

- انتي طلعتي من المجلس بتجري ليه كده؟! حصل حاجة؟

- لأ ياماما محصلش حاجة انا بس اتكسفت شوية ومقدرتش اقعد اكر من كده واتكلمت معاه خلاص وقمت

- طيب وانتي ابيه رأيك في الواد كويس؟

- ايوة ياماما الواد كويس

- طيب على بركة الله هنحدد معاهم ميعاد المرة الجاية بإذن الله عشان نشوف هنقرأ الفاتحة ولا ابيه؟

وخرجت الأم وإرتمت زُلفى على السرير تتأمل في السقف وتقول : ياه هو طلع لي منين الواد ده ياربي، انا أول مرة احس بكده طول حياتي، انا مش قادرة اعصابي كلها بترعش، انا اتخطفت وانا قاعدة ولا ابيه!

وكانت ليلة من أجمل الليالي التي مرت علي زُلفى ولا تدري ما القادم لها وكيف سيتم سير حياتها من الآن فصاعداً

## الفصل الثالث

يوم مشرق جديد استيقظت فيه زُلفي لتذهب الي العمل وقد كان مر علي خطبتها اكثر من شهرين وعلي علاقة طيبة مع خطيبها تيم الذي وقع في حبها من النظرة الأولى وقد بدأ الاثنين بتجهز المطلوبات اللازمة ل لأجل زواجهم بأسرع طريقة وأسلس شكل بدون ضغوط هائلة كما هو المعروف

ولكن زُلفي كان عندها أمر آخر بجانب زواجها إذ انها في العمل كان قد أوكل لها بمهمة ل إنجازها وهي تخص مشروع كبير وقد طُلبت هي بالإسم لتنفيذ هذا العمل وكانت تعمل فيه طوال الشهر الفائت بأكمله وقد كانت على مقربة من انهاءه والمتبقي ما هو الا قليل لهذا كانت مضغوطة اكثر وكانت في حالة تماسك شديد لأنها في اي لحظة تريد أن تقف وتتهار إذ انها لا تتحمل الضغط الكبير عليها وهذه ليست صفة شخصية تمتاز هي بها بل هي صفة اي بنت لديها عمل ... وقد كانت تفكر في كل هذه الأشياء وهي في الطريق الي العمل

وعندما وصلت زُلفي الي العمل إذا بها تجد شيئاً غريباً تجد ان الجهاز الذي تعمل عليه فى المكتب الخاص بها لا يريد أن يعمل؟! فتعجبت وحاولت مرة واثنين وثلاثة ولكنه لم يعمل أيضاً فنادت الي الفني التقني في المكان وعند المعاينة وجد شيئاً فقال لها

- أستاذة زُلفي الجهاز بتاعك اتحرق!

- أزاي يابشههندس عادل؟ اتحرق ازاي ماهو كان شغال إمبارح

- مش عارف بس انا عايز اقولك ان فى مادة سايلة وقعت عليه حضرتك كنتي بتشربي جنب الجهاز ولا حاجة

- لأ طبعاً انا مش بشرب ولا باكل أساساً وانا شغالة ثم انا اكيد مش هسيب مائة او اي مشروب جنب الجهاز اللي شغالة عليه!؟

- طيب بصي انا هاخذ الجهاز بتاعك واحاول اني اشتغل فيه واعمله صيانة ممكن يشتغل تاني

- بص انا مش فارقة معايا اي حاجة انا بس الداتا بتاعت المشروع والشغل بتاعي انا محتجاه ضروري ده أهم حاجة عندي

- طيب انا هحاول وبإذن الله يشتغل

وفي هذه اللحظة أتت نوال صديقتها فى العمل وهي تبستم كالعادة بابتسامة صفراء وهي تقول

- ابيه ده انتي مجبتيش مشمش معاكي ليه انهاردة
- مشمش ابيه بس دلوقتي يانوال سبيني فى المصيبة اللي انا فيها ديه
- مصيبة ابيه كفنا الشر
- الجهاز بتاعي جيت اشغله لقبته مش بيفتح ندهت علي المهندس عادل يشوفه  
قالي انه اتحرق وقعت عليه مائة ولا حاجة
- وهنا حاولت نوال ان تخفي ابتسامة كادت ان ترتسم علي شفاتها ولكنها  
منعتها ولكن زُلفي قد رأتها وقد قالت نوال
- يانهار أبيض طيب و هتعلمي ابيه دلوقتي؟
- مش هعمل حاجه هضطر اني استني المهندس عادل هيعمل ابيه ويقولني
- طيب ميهمكيش يا حبيبتي فداكي الف جهاز ميهمكيش
- فداني ابيه بس يانوال المشروع الجديد اللي انا شغالة عليه الداتا والشغل كله  
على الجهاز مينفعش الجهاز يحصله حاجة
- يابنتي متقلقيش هيتصلح ويرجع احسن من الأول انتي بس روقي كده،  
معلش بقى هضطر اسيبك عشان اروح اشوف شغلي

وقد ذهبت نوال وزلفي تنتظر إليها وتقول في نفسها : ياه عليكى يانوال مش عارفة حتي تداري فرحتك وشماتك فيا، كان باين اووي عليكى انك فرحانة فيا وان الجهاز بتاعي اتحرق

ولا انا اللي أوفر وبفتري عليكى دلوقتي ولا ابيه؟!!

وظلت زُلفي جالسة حتى تلقت الخبر ان الجهاز لن يعمل مجدداً ولكن البيانات المخزنة عليه سوف يتم استرجاعها ولكنه قد يستغرق يومين على الأكثر فارتاحت زُلفي قليلاً وقررت الرجوع إلى المنزل وهى فى الطريق وجدت اتصال قادم من صديقتها ( نورهان ) وفتحت عليها :

- أيوة يازلفي انتي فاضية انهاردة؟

- هو انا كان عندي شغل بس ممكن أجله يعني، في حاجة

- لأ مفيش بس عايزة اقابلك اكلملك شوية

- طيب تمام هنتقابل فين

.....

وفى المطعم المعتاد الذي يتقابلو فيه دائماً انتظرت زُلفي صديقتها كالمعتاد بدون اعتبار اي أهمية القدوم فى الموعد لأن زُلفي تضيقها هذه الأشياء

ولكنها أصبحت معتادة ف انها دائما كانت توبخها حول المواعيد وانها تنزعج  
والأخرى تقول لها حسنا فهمت لن اتأخر المرة القادمة ولكن المرة القادمة لم  
تأتي أبداً ويبقى الحال كما هو عليه، حتي خرجت زُلفي من تفكيرها عندما  
رأت صديقتها قادمة لها من مدخل المطعم وجلست نورهان وهي غاضبة  
وتقول :

- معلى علي التأخير بس المواصلات كانت زي الزفت

- لأ عادي ولا يهملك عاملة ابيه؟

- انا تمام يعني تقديري تقولي كده لحد دلوقتي!

- ليه يعني ابيه اللي حصل في حاجة؟

- انا واقعة في مشكلة جامدة وعايزكي تساعدينني معنديش غيرك اروحله

وهنا اعتدلت زُلفي من وضعيتها وجلست لتسمع من صديقتها التي اكملت  
قائلة :

- طبعا انتي عارفة المشاكل اللي بيني وبين اهلي بخصوص الجواز وأنهم

عايزين مني اتجوز العريس اللي هما جابوه ليا وانا مش موافقة وعاملة

اتخانق معاهم طول الفترة اللي فاتت امبارح شديدت معاهم وبابا قالي انه

هيجب الواد وانه موافق وهيقوله انه موافق وهيمشي الجواز غصب عني

قمت زعقت فيهم وقلت لهم انا مش متجوزاه ياكش امشي فى الحرام قام بابا

اتعصب وحاول يضربني ماما بعدته عني وقمت سبت البيت ونزلت ورحت  
عند خالتي جنبنا ورحت مقلتش حاجة كأنها زيارة وبييت عندها هناك عادي  
يعني وفضلت قاعدة معاها لغاية انهاردة وبعد العصر قتلها اني نازلة  
وراجعة بيتنا بس طبعاً انا مش هقدر ارجع عشان كده كان لازم اقابلك  
واقولك تحاولي تساعديني!

- طيب يانور هان في حد يقول كده ل اهله الله يهديكي أدام انتي رافضة  
العريس اووي كده مقلتهمش ليه على اسبابك

- قتلهم بس هما مسمعوش مني

- طيب والحل ابيه دلوقتي؟! ناوية تعملي ابيه؟

- ممكن تخليني ابات عندك في البيت انهاردة

- هي مش فكرة انك تباتي فين المهم انتي هتعملي ابيه بعدين

- انا بس عايزة انهاردة أريح ومن بكرة بإذن الله هروح أأجر شقة اقعد فيها  
تبع واحدة صاحبتني كانت قالتلي عليها قبل كده

- انتي بتقولي ابيه يابنتي شقة ابيه وبتاع ابيه انتي لازم تروحي تحاولي  
تصالحي ابوكي عشان ترجعي تاني

- مش هينفع ارجع وانا مش هرجع غير اما يعتذرو مني!

- يعتذرو من مين يابنتي عايزهم هما اللي يعتذرولك

- ايوة مش هما اللي اجبروني اني اطلع واسيب البيت وكانو هيغصبوني علي العريس كمان

- طيب قومي معايا انا جاية معاكي البيت هكلم عمو وطنظ وان شاء الله نوصل ل تفاهم وهحاول أراضيهم وأهدي الأمور شوية يلا قومي معايا - لأ مش قايمة في حته انا مش هرجع البيت لو مش عايزة تخليني أبات عندكم يبقى تقولي يلا سلام

وقامت نورهان لتخرج من المطعم وزُلفي لا تعرف ماذا تفعل ف انها ليست أساساً في اي موضع لـ تحمل مزيد من الضغوط فلم تدري ماذا تفعل فلم تجد نفسها الا ان تتصل بخطيبها تيم وقد فتح الآخر السماعة في دهشة فقال :  
- زُلفي؟

فقلت في سرعة من أمرها :

- تيم ينفع تنزل تقابلني دلوقتي انا محتاجة مساعدتك!

وهنا تحرك تيم مسرعاً بدون خوض في تفاصيل فقال :

- انتي فين؟



اللي يخلصك يخلصني ف انا مش مضايق ومش عايزك تضايقي خالص انتي  
عملتي اللي عليكي انا معاكى وهنتصرف وهنلاقي حل سوا متخافيش

نظرت له زُلفي ولم تعلق وظلت تنتظر له في صمت وهي تحاول أن تهدئ  
من نفسها فنظر لها مستغرباً :

- في حاجة في وشي ولا ابيه؟

- لأ مفيش حاجة ، انا بشكرك ياتيم علي وجودك

- والله انا اللي المفروض أشكر ربنا انه رزقني واحدة رقيقة وجميلة زيك

فأتكسفت زُلفي منه فتدارك تيم الموقف قائلاً :

- طيب هي صحبتك ديه راحت فين لما سابتك

- انا مش عارفة هي سابتنى ومشيت من غير ماتقول بس اعتقد انها رجعت

تاني عند خالتها

- طيب انتي عارفة فين بيك خالتها ده ولا ابيه نروح ونشوفها

- ايوة عارفاه جنب بيتهم

- طيب يلا نروح له

وبعد ذهابهم الي البيت قامت زُلفي بسؤال الخالة سؤال غير مباشر لكي لا تشك الخالة بشيء إذا لم تكن تعرف شيء فستحدث مشكلة فقالت لها انها كانت مع نورهان وقد كانت ذكرت نورهان انها قد تمر عليهم فهل مرت ام انها لم تأتي إليها بعد؟

فردت الخالة بأنها حين غادرت بالصباح لم تأتي ثانياً حتي الآن ف ابتسمت لها زُلفي وشكرتها ومضت وهي تحاول أن تتصل ب نورهان ولكنها لا ترد على هاتفها حينها قال لها تيم

- خلاص زمانها روت البيت أدام مرجعتش ل خالتها ولا ابيه؟
- انا مش عارفة ياتيم والله بس هي كانت رافضة ترجع رفض قاطع مش عارفة ، انا خايفة ارواح لهم البيت اسألهم عليها وتكون امها عارفة انها عندي أو معايا ولما تعرف انها مش عندي تقلق ويحصل مشكلة! ياارب ياااارب انا تعبانة ومش حمل هم زيادة ياارب أفرجها
- متقلقيش يازلفي هتعددي وهتهون انتي بس روقي علي نفسك كده ويلا عشان ترجعي عشان الوقت اللي اتأخر ده

وظل تيم مع زُلفي حتى اوصلها الي البيت وتأكد عليها ثم رحل وصعدت زُلفي وهي منهكة حتي وصلت أمام الباب وحاولت إدخال مفتاح الباب ولكنه

لك بفتح وحاولت مرة أخرى عندما انفتح الباب ونظرت فرأت نورهان أمامها  
وهي التي فتحت لها الباب!

- اهلا يازلفي تعالي خشي

نظرت لها زُلفي نظرة استغراب ودهشة كبيرة وهي تقول  
- انتي جيتي... انتي هنا بتعملي اييه؟... انا كنت بتص...

فقاطعتها نورهان قائلة

- ششششش اسكتي انا مقلتش حاجة ل طنط تمام

فنظرت لها زُلفي وهي تحاول استيعاب ما يحدث

حتي خرجت والدة زُلفي قائلة :

- انتي جيتي يا حبيبتي صاحبك نورهان جت عدت عليا من ساعة ولا حاجة  
وقالت لي انها هتبات عندنا انهاردة عشان بتقول انهم هيسافرو كام يوم  
وراجعين تاني ف جت تقضي معانا يوم كده تشبع منا يعني وانها استئذنت  
أهلها انها تبات عندنا انهاردة وهتمشي بكرة

وهنا ظلت زُلفي مصدومة من الكلام الذي يقال وهي لازالت غير مستوعبة  
ما يحدث وتتنظر الي نورهان التي غمزت لها بأن لا تقول شيئاً وان تواكب  
الموقف بسكوت

فنطرت مجدداً الي أمها وقالت :

- طيب ياماما انا داخلة اغير هدومي عشان تعبانة اووي انهاردة تعبت في  
الشغل وبرة الشغل وعايزة ارتاح

- طيب مش هتتغشي معانا بابا زمانه علي وصول

- تسلمي لي ياماما بس بجد مش قادرة خالص اريح حبتين بس ولو قدرت  
اقوم تمام مقدرتش خالص

ودخلت زُلفي غرفتها وأغلقت بابها على نفسها وشعرت ان الدنيا تدور بها فـ  
ارتمت على السرير تحاول استرجاع تركيزها فسمعت حينها طرقات على  
الباب ونورهان تقول لها من خلف الباب :

- افتحي يازلفي عايزة اتكلم معاكي افتحي

- استني لما اغير هدومي

- يابنتي افتحي الباب طيب قبل ماتغيري هدومك

- قلناك استني اغير وافتحلك الله!

.....

وبعد أن انتهت زُلفي مسكت هاتفها فوجدت تيم قد أرسل رسالة ليطمئن عليها ، فضحكت زُلفي هل تخبره بما وجدت هنا وانها بعد التعب والبحث عنها والاتصال بها وضغط الأعصاب اذا بها تراها في بيتها وهي التي تفتح لها باب الشقة بكل برود أعصاب ولا كأن شيئاً حدث إطلاقاً

وبعدها تركت الرسالة من دون فتحها او الرد عليه

وخرجت ففتحت الباب لتخرج وتأكل مع امها وابيها وأخوها ونورهان ولم تتكلم فى شيء حتى انتهت من الأكل فدخلت الي غرفتها وبدأت بتجهيز سريرها ل النوم حتى لحقت بها نورهان فوقفت على باب الغرفة واستندت بذراعها على الباب وقد شبكت اذرعها وقالت بصوت حازم :

- انا مكنش عندي مكان ارجع له غير هنا ومكنش عندي غير اني اقول الكذبة الصغيرة ديه علي طنط عشان متفضلش تسألني أو تتصل بيهم وامي عارفة اني عند خالتي لغاية دلوقتي وخالتي عارفة اني فى البيت دلوقتي ومفيش اي مشاكل ف مش عايزاكي انتي اللي تعملي المشكلة تمام!

فلم تنظر لها زُلفي حتي وظلت ترتب فى السرير وقالت وهي تضع الفراش :

- انا مش هقول حاجة ومش هعمل مشاكل متقلقيش

-طيب تمام اووي انا اصلا ماشية بكرة ومش هرجع لهم البيت تاني وهعرفهم  
ازاي يعملو فيا كده انا هخليهم يرجعو يعتذرو مني وهخل....

فقاطعتها زُلفي بصوت حازم وقد نظرت لها نظرة شرسة :

- انا عايزة أنام ف مش عايزة صوت شوفي لو هتدخلي تنامي أو هتخرجي انا  
عندي شغل بكرة ولازم أنام!

فنظرت لها نورهان نظرة مشمئزة وتركتها وخرجت وقد اغلقت الباب  
وراءها

وهنا زُلفي حاولت النوم فوجدت نفسها ان عينها بدأت تسيل الدموع منها وقد  
كانت تحملت طووال اليوم وهاا هنا كانت القاضية هنا كانت وصلت ل أقصى  
درجات التحمل ، ولا ضير في الأنهييار الآن لكي تكسب القوة لتواجه الغد بما  
به من أحداث ونامت بعد جلسة من الأنهييار التي دامت حوالي ساعة وبعدها  
نامت من شدة التعب

وفي الصباح التالي استيقظت زُلفي وفتحت عينها وهي تنظر الي السقف  
ونظرت الي جانبها علي المكتب لترى كم الساعة فوجدتها ٧ صباحاً فقامت  
لترى أين نورهان فلم تجدها في المنزل وكان الجميع في المنزل نائمون

فحاولت الإتصال بها ولكن هاتفها كان مغلقاً فذهبت لتستعد للذهاب إلى العمل  
وبالفعل نزلت وتوجهت الي العمل حينما قابلت المهندس عادل فقالت له :

- بشمهندس حضرتك عملت ابيه في الجهاز بتاعي

- انا الحمد لله قدرت انقل الملفات بتاعتك علي هارد خارجي بس انا كنت

عايز اقولك على حاجة

- ابيه؟

- السائل اللي وقع على الكمبيوتر وقع عن عمد عشان السائل كان في إمكان

محددة على الجهاز مش واقع علي المكان بالكامل ، ف انا حبيت اتأكد

وراجعت الكاميرات عند مدير الأمن وقتلته احتمال يكون ده متعمد وبالفعل

لقينا حد حاول انه يقرب من الجهاز بتاعك في يوم اجازتك اللي كان من كام

يوم

وكانت زُلفي تسمع هذا الكلام في دهشة غريبة حين قالت :

- طيب مين اللي عمل كده يابشمهندس؟

- زميلتك نوال! تحبي ناخذ إجراء ضدها ونعملها تحقيق ونـ...

- لأ يابشمهندس أنا مش عارف ايوة حد يقرب منها ، ومش عايزة حاجة

تروح ل الإدارة عشان هيرفدوها وشغلها هيوقف

- بس هي حاولت تأذيكي في شغلك وتحرق الجهاز اللي انتي شغالة عليه ،  
وانتي مش عايزه تعملي لها حاجة وخايفة علي شغلها!

- بص يابشمهندس انا أهلي علموني اني ماذيش حد وابعد عن الأذية وظلم  
الناس حتى لو هما ظلموني انا عندي ربنا (وحسبي الله ونعم الوكيل) كفيلة  
وربنا اكيد هيرد حقي ليا ، ف عشان كده انا مش عايزة حد يتعرض لها وانا  
هعرف اخذ حقي منها بطريقتي من غير أذية ليها

فسكت المهندس عادل من كلام زُلفي وقال لها :

- والله مش عارف اقولك ابيه بس حقي ربنا يجازيكي خير اللي انتي بتعمليه  
ويكثر من اللي زيك

فابستمت له زُلفي ورحلت وهي تقول في نفسها : لو اللي زي كتره الحياه  
مش هتمشي ياهندسة

وبعد يوم طويل من استخدام وتهيئة البيانات المستخرجة من الجهاز المحترق  
الخاص ب زُلفي واستخدامها ل جهاز جديد لوضع البيانات فيه حتي أنتهت  
وأغلقت الجهاز حتي قامت وقد كان اليوم هذا اجازة ل صديقتها نوال  
وخرجت من العمل وكانت قد اتفقت مع تيم أن يزورهم فى البيت لتخبره

بالمستجدات وعندما وصلت الي البيت وجدت أمام الباب أحذية متعددة فدخلت فوجدت أمامها أمها وتيم ووالدة نورهان ووالدها مجتمعين وكان وجه ام نورهان محتقن وكانها غاضبة ، وعندنا دخلت رأتها والدة نورهان حتى توجهت إليها قائلة :

- زُلفي انتي تعرفي نورهان فين؟

فطرت إليها وهي لا تدري ما يحدث وحين كانت ستتكلم باغتها الأب فقال :  
- نورهان سابت لنا رسالة بتقول انها مش ناوية ترجع تاني وانك آخر واحدة هي كانت معاها ، تعرفي هي فين؟

وهنا ردت ام زُلفي فقالت :

- يا جماعة هي كانت عندنا إمبراح جت متأخر وقالت انكم مسافرين كام يوم عشان كده جت تبات عندنا ومشيت الصبح حتي قبل ما حنا نصحي منعرفش احنا اي حاجة عن اللي انتم بتقوله ده وانها سايبه البيت من كام يوم ديه!

فردت عليها ام نورهان قائلة :

- بنتي قالت لنا انها مش هترجع عشان مش موافقة علي العريس اللي احنا جايينه وقالت لو عايزين تعرفو مكانى زُلفي الوحيدة اللي تعرف!

وهنا صدمت زُلفي مما سمعت وبدأت بالدفاع عن نفسها :

- لأ مش صح الكلام ده! انا معرفش هي راحت فين ، مرضتش حتي تقولي لما قتلها أنا والله ماعرف!

فردت عليها أمها ( أم زلفي)

- ثانية واحدة! يعني انتي كنتي عارفة انها كانت سايبه البيت لما جت لنا امبارح وقتليش!؟

وفي هذه الثانية تدخل تيم في الكلام فقال :

لأ انا كنت معاها امبارح وكنا بندور عليها عشان هي كانت سابت زلفي في المطعم ومشيت ورحنا سألنا عليها عند خالتها بس مكانتش هناك وزلفي كانت تعبانة اووي ساعتها ، بس انا مكنتش لسة عرفت انها كانت هنا امبارح وانها رجعت علي بيت زلفي!

ونظرت زُلفي الي تيم الذي نظر لها هو الآخر وقد فهمت ان الجميع الآن يتهمها وانها لم تخبر اي حد بأي شيء وانها الآن مصدر كل المشاكل فلم تتمالك زُلفي نفسها حتي فقدت الوعي وسقطت على الأرض

.....

وبعد قليل افاقت زُلفي في غرفتها والصداع سيفجر دماغها فوجدت اخوها الصغير لؤي ممسك بيدها وهو مغمض العينين ويحاول ان يقرأ بعض آيات القرآن التي هو حافظها

وعندنا سمعته ورأت مايفعله قالت :

- لؤي ياروحي انت بتعمل ابيه؟

وعندما رائها لؤي احتضنها وقال :

- زيزي انتي كويسة ، انا كنت خايف عليكى لما وقعدت علي الأرض وجريت عشان اشوفك وفضلت قاعد معاكى ومسبتكيش وفضلت أقرأ لك قرآن عشان لو تعبانة تخفي

ف احتضنته زُلفي وقالت :

- ربنا يخليك ليا يارب يا حبيبي وميحرمنيش منك أبداً ، هي الساعة بقت كام  
انا فضلت نايمة قد ابيه؟

- الساعة دلوقتي ٩ انتي منمتيش كثير تقريبا هي ساعة أو أقل ، أهل نورهان  
مشيو وتيم فضل قاعد عشان يطمئن عليك ولما فضلت لي نايمة ماما قالت له  
يروح واحنا هنظمنه بعدين

- شكراً يا لؤي انا بقت كويسة دلوقتي

ف أبتسم لها لؤي بأبتسامته الطفولية وخرج ، وعندها قامت زلفي وتوضأت  
وقامت ل الصلاة وبعد الانتهاء ظلت جالسة علي الارض ورفعت يدها عالياً  
وهي تبكي وقالت : يارب يسر لي أمري وهون على قلبي اني مستضعفة  
ومظلومة ، انا لم أفعل شيئاً خطأ في حق أحد ليحدث كل هذا لي! في العمل  
ومع امي ومع تيم ومع نورهان وأهلها ، يارب أعني وارزقني القوة ل اجتاز  
هذا الاختبار اللهم اني راضية به وصابرة يارب مافي قلبي يارب

ودخلت تنام زلفي بعد أن أفرغت مافي قلبها إلى ربها وانه هو نعم العون  
والملجئ

فلا تدري ماقد يحدث لها في الأيام القادمة ولا تدري ما ينتظرها في حياتها

## الفصل الرابع

وفي اليوم التالي أستيقظت زُلفي لكي تذهب إلى العمل فهناك أيضاً أمر يجب انهاءه وحين همت بالخروج سألتها أمها :

- انتي هترجعي انهاردة متأخر؟

- لأ ياماما ان شاء الله مش هرجع متأخر هخلص شغلي علطول وهرجع عشان ميعاد تسليم المشروع قرب ولازم اخلصه

- طيب تمام لما ترجعي نبقي نتكلم عشان نشوف حوار نورهان ده وأهلها!

- طيب ياماما اللي تشوفيه

وذهبت الي العمل وفي دماغها أكثر من شيء أولاً بما ينتظرها في العمل من تسليم ل المشروع ومن محاولة نوال في حرق جهازها لكي تعطلها في عملها ومن الضغط المستمر في المشروع ، وثانياً هناك أيضاً مشكلة نورهان وأهلها الذين يبحثون عنها وايادي الاتهام موجهة ل زُلفي بما قالته نورهان

وان زُلفي لا تعرف مكانها التي تقبع فيه الآن وأيضاً هناك سوء الفهم الذي حصل مع تيم حين نظر لها البارحة بنظرة هي فهمتها انه غير راضي بكونه لم يعلم بالمستجدات وانها لم تقول له ما حصل وانه تفاجئ وانه نوعاً ما أصيب بالخذلان

وكانت كل هذه الأفكار تدور في رأسها وهي أمام الابتوب الخاص بها على مكتبها الصغير حين باغتها صوت ينادي عليها :

- مهندسة زُلفي

فطرت الي الخلف فرأت السيكرتيرية الخاصة بمكتب رئيس مجلس الإدارة تنادياها ، فردت عليها قائلة :

- أيوة؟

- ممكن حضرتك تيجي معايا

وقامت زُلفي معاها وقلبها يدق وتقول " يارب ماذا الآن أيضاً "

وحين وصلت زُلفي الي مكتب رئيس مجلس الإدارة ودخلت رحب بها وأذن لها بالجلوس وبدأ قائلاً :

- مهندسة زُلفي عاملة ابيه في شغلك؟

فردت زُلفي وهي لاتزال متوترة قائلة :

- الحمد لله والله كويسة والشغل ماشي

- طيب الحمد لله انا بس جبتيك عشان أطمئن علي شغلك ولو في اي مشكلة واقفة معاكي؟

- لأ مفيش اي مشاكل الحمد لله هو بص حضرتك عارف الضغط بتاع الشغل وخصوصاً ان ميعاد تسليم المشروع قرب وقلقانة يعني وكده

- أيوة طبعاً ربنا يكون في عونك انا واثق فيكي وفي شغلك

- ربنا يخليك يافندم

ونظر إليها وهو صامت لثوان حين قال :

- هو في حاجة او في مشكلة عندك؟ اصل انا لاحظت انك متغيرة الفترة اللي

فاتت مش بتركيزك ولا هدؤك المعتاد فحسيت ان في مشكلة معاكي ، انتي

عارفة انتي زي بنتي بالظبط وانا دلوقتي بكلمك مش كرئيسك في الشغل بل

كاوالدك يعني أنتي كويسة؟

وهنا همت زُلفي بالقيام وقالت وهي مبتسمة :

- ربنا يخليك يا أستاذ أسامة بجد انا متشكرة جداً ل سؤالك عليا ولأهتمامك بيا ، بس انا كويسة والله ومفيش عندي مشكلة هو بس شوية ضغط وهيروحو وهرجع زي الأول بإذن الله ، ومش عايزة أعطل حضرتك أكثر من كده ف هستاذن أنا!

فنظر لها أسامة وقد فهم انها غير قادرة على الحديث الآن وانها حزينة ولا تريد التكلم وانها ستبدأ فى البكاء ان زاد سؤاله عن حالها ، فأبستم لها قائلاً :  
- اتفضلي يازلفي

فخرجت زُلفي وهي تجمع أنفاسها وتحاول السيطرة على شكلها وانها صمدت حتى النهاية من سؤاله المتكرر ولم تبكي فجأة ورجعت الي الابتوب الخاص بها وتابعت العمل وفى وقت الاستراحة خرجت لتأكل فى البوفيه الذي فى الحديقة الصغيرة وهي تمسك بهاتفها وتراسل تيم وتقول له انها تريده ان يأتي الي البيت ل التكلم معه لتوضيح بعض الأمور ، وهي تأكل أنت نوال من خلفها وهي تضحك وتقول لها :

- ابيه يا جميل بتأكل لوحدهك ليه كده؟

- مفيش قلت أقعد في حاجات عايزة ارتبها ف قاعدة بفكر فيها

- انتي صح عملتي ابيه في المشروع اللي شغالة عليه؟ بعد ما الجهاز بتاعك  
اتحرق عرفتي تصليحه ولا ابيه؟

نظرت لها زُلفي نظرة استهجان وقالت :

- الجهاز بتاعي اتحرق ومشتغلش تاني!

- يااخبر! والله زعلت لك المهم متزعليش حاولي تعم...

- بس انا مكملتش كلامي!

فنظرت نوال متعجبة فأكملت زُلفي قائلة :

- هو ايوه الجهاز بتاعي اتحرق بس انا قدرت ارجع البيانات بتاعتي والشغل  
بتاعي اللي كان علي الجهاز وانا أصلاً كان عندي نسخة منه علي اللابتوب  
بتاعي ، فانا الحمد لله هقدر اكمل المشروع بتاعتي من غير مشاكل

فتابعت زُلفي وجه نوال وهي تتكلم فرأتها تبتسم إبتسامة صفراء قليلاً فقالت :

- شكلك مستغربة ولا ابيه؟

فنظرت لها نوال وقالت :

- لا وانا هستغرب من اييه يعني! ده انا فرحت لك انك....

وهنا لم تتمالك زُلفي نفسها وغضبت وهي تقول بـ انفعال :

- بجد! بجد فرحانة ليا! فرحانة بعد ماحاولتي تحرقني لي الجهاز اللي انا  
شغالة عليه ووقعتي عليه سائل عشان يتحرق وبالفعل اتحرق! ، ولسه ليكي  
العين تيجي تكلميني وتهزري معايا بكل وقاحة!

فردت عليها نوال مسرعة :

- انتي بتقولي اييه انتي كمان! مين ديه اللي حرقت الجهاز بتاعك انتي  
هتفتري عليا ولا اييه؟!

- بقي انا اللي هفتري عليك! ولسه لغاية دلوقتي بتتكري فعلتك ومصممة  
على الكذب!

- انتي بتتهميني اني حرقت جهازك بتاع الشغل! وانتي بقي كنتي شفتيني  
بعينك ولا حد جه وقالك؟!

- لا مش انا اللي شفتك الكاميرات ياهانم هي اللي جبتك! الكاميرات اللي  
خضرتك حاولتي تلعب فيهم وكنتي موقفة بعض الأفراد قدامهم عشان يحجبوا  
الرؤية عن جهازي بس انتي مختيش بالك من كاميرا كانت في الزاوية  
وجبتك والمهندس اللي راجع الكاميرات شافك!

وظلت نوال صامته ولم تعقب! وأكملت زُلُفي في نفس العصبية :

- وكل ده ليه يعني ها؟ كل ده عشان المشروع اتوكل ليا انا اعمله  
ومر حلكيش ، بتبصي ليا في شغلي وطمعانة وبتحقيدي عليا عشان الناس هنا  
بتحبنى وبتحترمني على عكسك! بس انتي مسألتيش نفسك ليه؟ انا بتعامل  
بحسن نية وبطريقة كويسة من غير مصالح برضو على عكسك انتي محدش  
طايقك هنا عشان انتي مش كويسة مع حد اسلوبك وحش مع كله والكل بعد  
عناك ومش مصاحبك حد هنا غيري ، قلت انك وحيدة وليكي طريقتك في  
التعامل محبتش آخذ جنب زي الباقيين وقربت منك وصاحبتك عشان في  
الأخر تحسديني وتأذييني في شغلي! هو ده جزائي ، حاولت اني دائماً اساعدك  
واشيل معاكي شغلك وكنت بضغط على نفسي وانتي مكننتش باخد منك غير  
التقويم والكلام اللي يسد النفس كنت بشوف في عينك نظرة الانتصار لما  
بكون مضغوطة وتعبانة ومبيهونش عليك حتى تواسيني! مش بتسألني غير  
في اللي ليكي فيه مصلحة مش بتسألني ليا ، أنا نية ومش بتفكري غير في  
نفسك! واسة جاية تكلميني عادي ولا كأن فيه حاجة!

ولعلمك بقى عشان بس تكوني عارفة المهندس اللي راجع الكاميرات وشافك  
جه قالي انه هيعمل هيبيلج مجلس الإدارة وهيعملو محضر ضدك كنتي  
هتترفدي وهتتأذي في حياتك وقالو لي احنا على استعداد اننا نعمل كده بس  
بكلمة مني!!! وانا اللي مردتتش وقلت لهم لأ أنا مش عايزة أأذي حد ويكون

بسببي انا مش هقدر استحمل الذنب ده على الرغم انك أذيتيني في الأول بس  
انا مردتش أرد لك الاذية يانوال! وهو ده فى الآخر جزائي!!!

وظلت نوال تسمع الكلام بصمت وهي مصدومة من عدة اشياء أولها انها لم  
تعرف تلك الفتاه الواقفة أمامها! هذه ليست زُلفي! منذ متى وزلفي أصبحت  
بهذه القوة وهذه الشراسة! كانت هذه المرة الأولى التي تري فيها زُلفي بهذا  
الغضب وكانها شخصية مختلفة تماماً والأمر الآخر انها كُشفت انها الفاعل  
وراء حرق الجهاز وانها كانت معروفة لدي الإدارة انها الفاعل

وبعد أن انفجرت فيها زُلفي تركتها وذهبت ورجعت الي مكتبها ولكنها لم تكن  
تستطيع التركيز إذ انها كانت غاضبة! ولأول مرة منذ مدة طويلة جداً تصل  
إلى هذا الغضب ، وقد كانت تنظر إلى أطرافها التي كانت ماتزال ترتعش  
وهي تقول في نفسها " في اييه مالك ، اييه اللي انتي عملتيه ده! انتي أول مرة  
توصلي ل الدرجة ديه من الغضب ، لوهلة انا مبقتش عارفاني "

وهنا استأذنت زُلفي ان تغادر مبكراً إذ انها لم تستطع البقاء اكثر من ذلك  
فقررت ان تخرج

وعندما خرجت نظرت الي الساعة وجدتها ال ٥ وقت الغروب وكان في  
رأسها أمور متعددة وقررت ان لا تركب اي مواصلات وانها ستمشي وظلت

تتمشي حتى أمتها قدمها ونظرت أمامها فوجدت حديقة ذات مساحة خضراء  
كبيرة ومفتوحة فقررت الراحة هناك قليلاً

كان على يمينها ويسارها العديد من الورود ذات الألوان المختلفة وظلت تنظر  
لهم وهي معجبة بشكلهم إذ انها في الأساس تحب المساحات الخضراء  
والورود وتري في الورد انعكاس لها ، الوردة تكون لها شكل زاهي وجميل  
ولكن شكلها الجميل هذا يلفت لها الأنظار إذ ان اذا رأي أحدهم وردة واعجب  
بها فإنه يعبر عن حبه لها بقتلها! يقوم بقطف وقتل الوردة لأنها اعجبته وهي  
أيضاً مثل الوردة كلما رآها أحدهم يحاول قطفها لكي يقتلها ولأن الوردة  
ضعيفة لا تستطيع أن تحمي نفسها حتي اذا كان بها بعض الشوك لحمايتها  
وظلت في الحديقة قليلاً واخذت تمشي فيها وتصور من الورود والأشجار  
وشمس الغروب ما يمكنها ثم همت بالرحيل عندما تأخر الوقت ورجعت الي  
البيت

عندما دخلت إلى البيت جلست مع امها لأنها كانت تريد أن تتحدث معها  
بخصوص نورهان وعائلتها ، فجلست الأم وامامها البنت فسألتها عن الذي  
حدث فأخبرتها زُلفي كل التفاصيل والأحداث منذ البداية حتى انهشدت الأم  
قائلة :

- ازاي يعني هي دلوقتي كذبت علي خالتها وعلى امها وعليا انا لما جت لي هنا وافترت عليكي لما قالت ل أهلها انك عارفة مكانها! طيب هي ليه قالت كده ليه يعني تفترى عليكي!؟

- عشان هي واحدة مجنونة ياماما عقلها لسع ومبقاش حد يقدر يقف قصادها ومبقتش بتحترم حد لا ابوها ولا امها ولا انا ولا اي حد عشان كده!

- طيب انتي دلوقتي مش عارفة مكانها طيب هنقول ابيه ل أهلها ؟

- والله ياماما انا هقولهم الحقيقة صدقونا تمام مصدقوناش مش مهم ومفيش مشكلة محدش له حاجة عندنا عشان انا زهقت!

نظرت الأم الي ابنتها متعجبة ولم تعلق ، فأكملت زُلفي قائلة :

- انا عملت اللي عليا دورت عليها وحاولت أقنعها اللي هي بتعمله ده مش هينفع بس هي مسمعتش الكلام!

- طيب تمام خلاص ان شاء الله هنروح ل أهل نورهان عشان نكلمهم ونحاول نفهمهم الكلام ده ، بس دلوقتي تيم جاي في الطريق لازم نحضر له العشاء يلا قومي ساعديني

وبعد قليل أتي تيم الي منزل زُلفي وجلس وأكل معهم وظلت زُلفي طوال  
الجلسة صامته ولم تنظر حتى في وجهه تيم وعندما أنتهي الطعام جلس تيم  
مع زُلفي ليتكلمو قليلاً وظلت زُلفي صامته حتى قال تيم :

- انتي ز علانة مني ولا ابيه؟

- لأ خالص أز عل منك ليه يعني

- أصل انتي مبصتلش حتى واحنا بناكل قلت يمكن تكوني ز علانة ولا حاجة!

- لأ أبداً انا مش ز علانة منك خالص ده انا اللي كنت خايفة لا تكون انت اللي  
ز علان مني

- وانا أز عل منك ليه يعني؟

- بسبب اللي حصل إمبراح اني مقلتلش على اللي حصل معايا شفتك كأنك  
أتضايقت مني اني مكلمتكش نظرتك ليا إمبراح وصلتلي كده!

- لأ انا مز علتش منك ولا أقدر از عل منك هو كل ما في الأمر اني اتفاجئت  
زيهم امبارح اني مكنتش عارف حاجة وخصوصاً اني كنت معاكي يعني لما  
رحنا ندور عليها وملقنهاش

- بس انت نظرتك ليا امبارح كانت اني خنت ثقتك وخبيت عليك ومقلتلش!

هنا أبتسم تيم وقال :

- وانتي استنتجتني من عنيا ازاي بقى الكلام ده؟ انتي يمكن وصلك المعنى غلط بس انا مكنتش زعلان انك مقلتليش انا مراعي اكيد انك مقدرتنيش تقولي او انشغلتني او حتي انتي ممكن مردتنيش تقولي لي عشان مصلحة قدام مثلاً ، انا مراعي اي حاجة ممكن تعملها ومش همسك عليكي اي حاجة ، انتي تعملي اللي انتي عايزاه وانا أبداً مش هظن الظن السيء فيكي مش هتحصل!

ونظرت له زُلفي ولم تعقب وبعدها قال لها :

- ايبه بقى اللي كنتي عايزة تكلميني فيه انهاردة؟

- في حوار حصل معايا في الشغل من فترة ومكنتش عارفة اقولك التفاصيل ل سرعة الأحداث اللي كانت بتحصل!

- طيب وايبه اللي حصل معاكي؟

واخبرته زُلفي بكل شيء حتي التصادم الذي حصل بينها وبين نوال اليوم ، واتبعته قائلة :

- انا غضبت بدرجة كبيرة ومكنتش قادرة اسيطر على اعصابي وقلت كلام كبير وجارح ، انا مضايقة من نفسى اووي

- متقلقيش ولا تزعلي انتي معملتنيش اي حاجة غلط انتي دافعتي عن نفسك وعملتني الصبح ووقفتيها عند حدها عشان متماداش وتأذيكي أكثر ومش بس

كده لو انتي زعلانة كمان انك ممكن تكوني أوفر ، ف احب افكرك انك  
اخترتي انك متأذيهاش زي ماهي أذتك انتي كان عندك اختيار انك تاخدي  
حقك منها بس قلبك الأبيض منعك وقال لأ ، ولو اي واحدة غيرك والله  
مكنتش اترددت ثانية!

- طيب وانت زعلان اني سامحتها كان المفروض أخذ حقي!؟

- زعلان! انتي بتقولي ابيه ده انا مبسوط من اني معايا واحدة بقلبك الجميل  
النقي ده! هو في واحدة زيك أصلاً ، ولو في اي حد حاول يزعلك او يقرب  
لك بس بعد كده انا هقف له ومش هخلي اي حد يهوب لك انتي مينفعش  
الفرحة تفارقك انتي موجوده هنا عشان تفرحي وتكوني سعيدة ، بالله عيونك  
دول ينفع يكونو زعلانين ولا يعيطو! طب والله ماينفع

بعدها شعرت زُلُفي بالخجل وابتسمت وقالت :

- انا مش عارفة ارد عليك أقولك ابيه بجد انا اللي بحمد ربنا انه رزقني  
شخص بيدعمني وواقف في ضهري دائماً وبيساعدني وبيهون عليا بجد شكراً

- لأ انا معملتش حاجة ، انتي اللي انا محتاج أشكرها وعائزك تروقي  
أعصابك عشان تسليم المشروع قرب وبإذن الله تخلصي علي خير

- تمام هقوم أعمل حاجة تشربها تشرب شاي ولا قهوة؟

- اي حاجة من أيديك حلوة

- يبقى هعمل شاي وهحط لك نعناع

- وانا موافق

وظلت الجلسة وتكلما حتى استأذن تيم بالرحيل ودخلت زُلفي ل النوم وهي سعيدة بعض الشيء وتحاول ان تدخر طاقتها لأن ميعاد التسليم خلال هذا الأسبوع وتريد ان تنجزه لانه سيكون بمثابة إنجاز كبير لها

وفي الصباح التالي ذهبت إلى العمل إذا بها تلاقي خبر استقاله نوال من العمل!!!

فأستغربت وذهبت إلى مكتب المهندس أسامة رئيس مجلس الإدارة لنتأكد منه على الخبر وحين دخلت استقبلها المهندس أسامة مبتسماً فسأله عن نوال فرد قائلاً :

- انتي عايزة تعرفي هل احنا رفدناها ولا لأ صح؟ طيب انا عايز أقولك اننا معملناش حاجة ليها ، هي اللي جت انهاردة الصبح وقدمت استقالتها ولما سألتها قالت إنها عندها ظروف وهضطر انها تغير محل السكن وظروف عائلية عشان كده وافقنا على استقالتها

فنظرت زُلفي له وهي تقول لنفسها :

- لأ هي مشيت بسببي! هي كانت خايفة اني ممكن افضحها او اقعد أذل فيها  
هي مشيت بسبب كلامي!

ولكنها لم تلحظ انها تتكلم بصوت مرتفع في حين سمعها المهندس أسامة فقال  
لها :

- زُلفي يابنتي ده مش بسببك ، هي مشيت لأنها ملقتش لنفسها مكان هنا ، هي  
أصلاً كانت متخائفة وعاملة مشاكل مع الكل هنا ومكانتش في حد بيحبها  
وشغلها كان ناقص وبيكون فيه مشاكل بس هي بعد الحركة اللي عملتها  
معاكى هي شافت انها مينفعش تفضل قاعدة اكثر من كده عشان شكلها بينا  
وخصوصاً انها عرفت اننا فوتنا لها الغلطة ديه ، فد عشان كده مش عايزك  
تزعلي ده مكنش بسببك هي اللي عملت كده

فنظرت له زُلفي وإستأذنت ل الخروج ورجعت الي عملها واخبرت تيم بما  
حصل وظل يقول لها كما قال أسامة وانه ليس خطئها وان لا تشعر بالندم ولا  
اي شيء وان تركز في المشروع وتعطيه الأولوية

وبعد انتهاء يوم عمل رجعت زُلفي الي المنزل ولكنها تلقت مكالمة من  
نورهان!

وعندها لم تدري ماذا تفعل فهي لم تكن تتوقع مكالمة منها وظلت تفكر خلال الخمس ثوان حتى فتحت ولم تاخذ ثانية حتى سمعت صوت نورهان فى الجهة المقابلة تبكي! وهي تقول ( الحقيني يازلفي! ) وتم إغلاق الخط!!!

هنا لم تدري زُلفي ماذا تفعل ولم تستوعب حتي ما الذي حدث منذ قليل؟! حاولت أن تتصل مرة أخرى ولكن الرقم مغلق! بدأت تتوتر والخوف يدب في قلبها وحاولت مرة أخرى وبعد عدة مرات لا رد أيضاً! هنا بدأت زُلفي في الخوف والقلق ولم تدري ماذا تفعل حتى ذهبت إلى أمها وقالت لها ماحدث منذ لحظات وبدأت ملامح الأم بالتغير أيضاً وقالت لها

- طيب أهدي احنا هنحاول نتصل بيها تاني وان شاء الله هترد ، وبما ان الموضوع ممكن يكون خطير كده احنا هننزل ل الشرطة وهما ممكن يتعقبو الرقم بقى وهما هيتصرفو بس لازم نتحرك بسرعة
- طيب وأهلها ياماما أمها وأبوها طيب هنعمل فيهم ابيه!
- هتصل بيهم واكلمهم يعني هو في حل تاني يلا بينا ننزل

وبالفعل ذهبو إلى قسم الشرطة حيث أبلغوهم بالذي حدث وتم استدعاء أهل نورهان للمتابعة معهم وفي حين تم الإتصال بها مراراً ولكن لم يكن هناك رد وقامو بمحاولة تتبع الرقم ل الوصول الي مكانه وقد تمكنو من الوصول اليه

وعرفو العنوان ولم يكن بعيد وذهبو بدورية من سيارتين شرطة بها أهل نورهان وزُلفي وأمها وقد اتي إليهم تيم وذهب معهم وحين ذهبو الي المكان كانت عمارة سكنية في منطقة ليست حيوية وقد صعِدو وفي كل طابق حتي وصلو الي المكان والشقة وطرقو فلم يجيب أحد فكسرو الباب فوجدو بالداخل نورهان ومعها بعض من البنات والشباب وقد كانوا يسكرون ولم يكن هناك مايدل على وجود خطر على حياه نورهان ... وعندما رأت نورهان المنظر والعساكر والظباط يدلّفون الي الداخل اندهشت وارتبكت وعندنا رأت امها وابيها حينها دب الرعب في قلبها وهمت بالوقوف وهي لا تدري ماذا تقول .....

- ماما بابا انتم.. انتم بتعملو ابيه هنا؟!!

ولم يسمح الوقت بالرد حين اتجه الضابط الأعلى الي نورهان وقال

- انتي نورهان؟!!

- أيوة انا نورهان!

- انتي كنتي مخطوفة ولا حد أجبرك على حاجة؟

- لأ مخطوفة ابيه؟! انا مش مخطوفة ولا حاجة انا اللي جيت هنا بإرادتي

ودول صحابي!

- انتي مش عملتي اتصال من شوية لصاحبتك زُلفي وقلتي لها تلحقك؟

- زُلفي! أيوة انا اتصلت بيها بس مقتلهاش تلحقني ولا حاجة! هي اللي

اتصلت بيكم وختلكم تيجو لهننا

- طيب تعالي معانا دلوقتي نكمل التحقيق في القسم وكل صحابك دول كلهم

هاتوهم يلا

وتم إلقاء القبض على مجموعة الشباب والفتيات وتم اخدهم الي القسم لمتابعة التحقيق وأخذ الأقوال ... ولكن كان في جانب آخر أهل نورهان ابيها وامها الذين كانوا في صدمة إذ انهم وجدو ابنتهم مع مجموعه من الفتيان والفتيات في شقة مغلقة عليهم ووجدو معهم زجاجات الخمر ورائحة التبغ وروائح أخرى منتشرة في المكان فلم يستوعبو الموقف بعد وكانت زُلفي أيضاً لا تختلف عنهم إذ انها كانت في صدمة مماثلة ولكن امها وتيم حاولو تهدئتها وان الأمور ستكون بخير

وفي القسم وأمام الضابط كان موجود من الحاضرين نورهان وامها وابيها

وزُلفي وامها وتيم وواحدة من الفتيان التي كانت مع نورهان ... إذ بدأ

الضابط بسؤال نورهان الآتي :

- انتي هربانة من بيتك بقالك أد ابيه يانورهان؟

- أنا يافندم مش هربانة انا بس كنت بايته عند صاحبتى وكنا عايزين نحتفل  
فعزنا صحابها وكان في شباب بس يعني

- أنتى هتكدي كمان! امك وابوكي قالو ان حضرتك هربانة ومتغيبه من  
البيت ومحدث كان عارف لك طريق!

- لأ مش صح انا كنت قايله ل زُلفي عن مكاني هي كانت عارفة!

هنا اتجهت أنظار الجميع إلى زُلفي حينما استوعبت زُلفي الكلام توسعت  
عينها بتلقائية قائله :

- مين ديه اللي كانت عارفة مكانك! انتى هتفتري عليا ، انتى مش كنتى عندنا  
قبل ماتمشي لما جيتى من غير أستأذان وكنا بندور عليكى انا وتيم ورحنا  
دورنا عن خالتك عشان حسبتك رحتي علي هناك زي ماقلتي وملاقنكيش  
ولما جيتى عندنا مقلتلش علي اى حاجة وصحينا لقيناكي مشيتى قبل  
مانصحي حتى؟!!

- لأ قلتك يازُلفي انتى بقى اللي نسيته او مردتيش تقولي ديه مشكلتك! يعني  
انا صحيح همشى وهختفي من غير ماحد يكون عارف طريقى!

- أنتى مصممة تكدي ليه ثم انا لو كنت عارفة مكانك اهلك لما جم يسألو  
عليكى مقلتلهمش ليه عن مكانك بدل مانكبر الموضوع ونوصله ل الشرطة  
يعني انا غاوية مشاكل ثم انا أصلاً أكذب عليهم ليه يعني!

هنا رد الضابط قائلاً :

- طيب أدام انتي كنتي قايلة ل زُلفي عن مكانك ليه اتصلتي بيها وقتلتها  
"الحقيني"

- الحقيني ابيه بس يافندم انا لما اتصلت بيها كنت عايزة أطمئن علي اهلي  
منها بس الشبكة عندي كانت وحشة عشان كده المكالمة قطعت وملحقتش  
اتكلم هي ممكن تكون سمعت غلط الحقيني ديه!

- يعني انتي بتقولي انك كنتي عايزة تتطمني على اهلك ف بدل ما تتصلي بيهم  
هما مباشرة اتصلتي ب زُلفي بس الشبكة قطعت المكالمة وانتي مقلتهاش  
الحقيني ديه .. صح؟

- ايوة صح

- انتي متأكدة؟!؟

- أيوة متأكدة

ثم قام الضابط بطلب هاتف زُلفي وطلب منها تشغيل شيء وبعدها سمع  
الحاضرين تسجيل ل مكالمة زُلفي مع نور هان وسمعوها تقول الحقيني يا زُلفي  
ولم يكن التسجيل طويلاً

بعدها ساد الصمت فبدأ الضابط بالكلام فقال :

- أنتي كدابة ومصممة على الكذب و عمالة تلفي وتدوري و عملتي بدل  
المصيبة اتنين وتلاتة وعايز اقولك انك هتتحبسي بسبب كمية الخمر  
والمخدرات اللي لقيناها في الشقة ، وفي تهمة كمان عن انكم كنتم في شقة  
مقفولة شباب وبنات حضرتك عارفة ده معناه ابيه؟!!

لم تستطع نورهان الكلام ولم ترفع بنظرها حتي عن الأرض وكان  
الحاضرين في حالة سكوت أيضاً حتي قامت زُلفي وقالت

- يا حضرة الضابط انا استأذنك نمشي لو مش هتحتاجنا في حاجة تاني

- لأ تقدري تمشي مش لازم تفضلو قاعدين

وهمت زُلفي بالخروج حين وقفت أمام نورهان وقالت

- أنا ميشرفنيش اني اعرفك تاني! انتي واحدة مريضة وانا نية و متستهليش  
مني اي حاجة بعد كل الخير اللي عملته معاكي ده يبقى جزائي وديه المعاملة  
ورد المعروف بتاعك! مش عايزة اعرفك ولا اشوفك تاني أبداً وانا بجد  
بحذرك!

وتركتها زُلفي' وخرجت مع امها ومع تيم وظل أهل نورهان بالداخل الأم  
تبكي على ماوصلت إليه ابنتها والأب وجهه متيبس لا حياه فيه!

وعندما خرجو شعرت زُلفي' برغبة كبيرة في البكاء ولكن ليس لأجل شيء  
غير انها تريد إخراج جميع المشاعر السلبية التي بداخلها تجاه كل شيء وكل  
شخص ، شعرت انها تريد بداية جديدة تبدأها مع نفسها وفي حياتها ، حينها  
وجدت نفسها تضحك علي الرغم من عيناها اللي تنهمر بالدموع بتعجبت  
ونظرت الي امها وقالت

- أنا بضحك وانت بعيط ياماما!

- يا حبيبتي متعيطيش هي متستاهاش دموعك مفيش حد يستاهل دموعك  
ياروحي

وهنا رد تيم قائلاً

- أنا مش عايزك تزعلي يا زُلفي' دموعك دول غالين أووي وانا بعتمدك نيابة  
عن كل حاجة وحشة حصلت لك

فنظرت له زُلفي وهي تبتسم

- شكرا ياتيم وانتي كمان ياماما انا بشكركم ربنا يخليكو ليا يارب انا باذن الله  
هكون احسن بيكم ، وصح انا عايزة اقولك حاجة ياتيم  
- قولي يا زُلفي؟

- احنا مش كنا محددين ميعاد الفرح بتاعنا ل بعد ميعاد التسليم بتاعي وعلى  
آخر السنة ديه صح؟!

فنظر لها تيم متعجباً وقال

- أيوة صح!

- طيب ابيه رأيك نتجوز الشهر ده؟! في عندك مشاكل؟

فتعجب كل من تيم وأمها فقالت الأم :

- يا حبيبتي انتي بتقولي ابيه؟ جواز ابيه اللي في شهر ده ثم انتي ليه بتعجلي  
الميعاد كده ممكن يكون تيم عنده التزامات ولا حاجة طيب؟!

ولكن زُلفي لم تكن تركز مع كلام أمها بل كانت تركز في عيون تيم ولم تكن  
تتنظر في اى اتجاه اخر كانت تنتظر له نظرة هو فهمها وادرك معناها حين  
قال :

**- وأنا موافق! معنديش مشاكل يلا نتجوز!**

هنا نظرت الأم الي تيم قالت اليه :

- موافق علي اييه يا حبيبي ديه واحدة متسرعة اي حاجة تدق في دماغها  
عايزة تعملها انت مش ملزم تزنق نفسك طيب

فرد تيم قائلاً :

- لأ أبداً انا مفيش اي مشكلة هتحصل بالنسبة لي وانا اللي هي عايزاه انا  
هعمله لها حتى لو كان طايش حتى لو هاجي على نفسي انا اصلا بحب فيها  
التهور ده والله

فنظرت الأم الي إبنتها ونظرت الي تيم ووجدت في أعينهم لمعة ونظرة جادة  
في الأمر وأنهم بالفعل متفقين ، وفي الأخير قالت :

- والله بقى انتم حرين اعملو اللي انتم عايزينه انتم اصلا جوز مجانيين اجتمعو  
مع بعض

فأبتسمت زُلفي وقالت :

- طيب يلا بينا نروح مش عايزين نأخر حاجة قدامنا شهر طويل ولازم ننجز

## الفصل الخامس والأخير

التاسع من أكتوبر... في ليالي وأيام الشتاء الباردة

فصل الشتاء من أحب الفصول لكثير من الناس حيث يكون به الهدوء وسكون  
النفس وبه من الكسل والخمول أيضاً مما يفضله بعض الناس ، ولكن أكثر ما  
يميز فصل الشتاء هو الحب

فيه يكون الحب له شكل وطعم مختلف ، تساقط الثلوج ونفحات الهواء البارد  
يخلق جواً من الرومانسية في الأجواء ، الإشتياق والشغف يكون مضاعف  
للأحبه والعشاق

في إحدى المباني السكنية في التاسعة صباحاً جلست تلك المرأة في شرفة  
منزلها وفي يدها كوب من الشاي المنعنع وترتدي نظارتها الخاصة بالنظر  
بعد أن انتهت من القراءة في كتاب الله ، وكانت في حالة من الاسترخاء حتي  
سمعت من خلفها صوت محبب جداً لقلبها فألتفتت ترحب وتستقبل بكل حب  
الفتاه التي قالت :

- صاحبة بدري وقاعدة في البلكونة لوحدك ليه يا قمر

- كالعادة يعني ما انتي عارفة بصحي بدري أقرأ شوية قرآن وبعدها أشوف  
ورايا اي في البيت ، بس ابيه المفاجأة الحلوة ديه

- هو أنا أقدر انسي! ، انهاردة عيد ميلادك يا جميل وكان لازم أجي بدري من  
أول اليوم عشان وحشاني جداً جداً

- ربنا يخليكي ليا يا مريم بس انتي عارفة إنني مبعثش أفكر وأهتم بالحاجات  
ديه أعياد الميلاد يعني أنا خلاص كبرت!

- مين ديه اللي كبرت؟! ده انتي شباب أكثر مني أنا يا قمر أنتي ، أنتي شكلك  
بقالك كثير مبصتيش في المرايا أنتي كل يوم بتحلو ، وفي عيني أنتي أجمل  
واحدة في الدنيا ، وفي عين اي حد تاني بالمناسبة

- حبيبتى يا مريم أنتي اللي عيونك جميلة عشان كده شيفاني جميلة بس

- ياه انتي عارفة... أنا عندي كثير بيندهو عليا بأسماء كثيرة وأسماء دلح  
أكثر بس أنا مبحبش أد إسمي اللي انتي بتقوليه لي

- يعني عايزانى أدلحك وأندهلك بأسم تاني يعني؟

- لأ لأ أبداً خالص أنا بحب أسمى وبحبه أكثر لما أسمعك منك مهما كانت  
أسماء الدلع بتاعتنا هيفضل أسمك الخام له رونق خاص لما بتسمعيه من حد  
وخصوصاً بقى لو حد كمان بيحبك ، بس صحيح فين حبيبي روميو مش  
شايلاه يعني؟

- ههه حبيبيك روميو مش هنا نزل من الصبح قال انه عنده حاجة محتاج ينزل  
يعملها

- يا خسارة ، يعنى هيرجع متأخر مش كده؟

- متقلقيش قالي أنه مش هيتأخر ، تعالي صح اورىكي حاجة بما إنك هنا كنت  
عايزة اقوم اشوفها تعالي نشوفها سوا

ووقفت المرأة أمام المكتبة الكبيرة الموجودة في المكتب الخاص بزوجها  
واخرجت منه شيء فنظرت مريم بدهشة وقالت :

- ياه ابيه الكتاب الضخم ده؟!!

- ده يا حبيبتي بقى ألبوم صور مش كتاب ، ألبوم صور خاص بالعيلة كلها  
متقسم أجزاء كل فرد في العيلة له جزء منه علي حسب ، أنا الصراحة واخدة  
الجزء الأكبر منه وبعدها تيم وبعدها ولادنا وهاكذا ، أنا كنت عايز افتحه  
عشان الجزء بتاعي في الألبوم خلاص قرب يخلص مبقاش فاضل فيه غير  
صفحتين تقريبا أو ثلاثة فاضين هملاهم انهاردة بإذن الله تعالى نفتحهم كده  
ونشوف....

ونظرت مريم وهي في دهشة وحماس أيضاً لترى ماذا يخبأ هذا الألبوم من  
صور وذكريات...

وجلسو في الغرفة وفتحت زُلفي الألبوم وبدأت تقلب الصفحات وتبتسم وتقول  
ل مريم :

- انتي عارفة ، في كتير من الصور ديه انا فاكرة كويس أووي الموقف اللي  
هي اتلقت فيه او المناسبة بتاعتها تحبي اقولك عليهم

ثم اومات مريم بـ نعم تريد وعينها تلمع من الحماس فأبتسمت زُلفي وقالت لها  
:

- عينك بتلمع ليه كده متحمسة ولا ابيه؟

- أكيد طبعاً متحمسة إني أسمع منك موافكك وظروفك اللي مرיתי بيها

وفتحت أول صفحة لها في الألبوم وكانت صورة زُلفي وهي طفلة صغيرة  
وعلي يد والدها فقالت :

ديه بقى صورتني مع بابا الله يرحمه كنت هنا عندي حوالي ٣ أو ٤ سنين  
وكانو بيحتفلو بعيد ميلادي ساعتها ، طبعاً انا مش فاكرة بالضبط الموقف اللي  
كان ساعتها بس لما سألت أبي عليها قالي أن اليوم ده حصل حاجة لطيفة جداً  
، أنا زي ما انتي عارفة كنت صغيرة وكده هادية مش من الأطفال اللي  
بيصرخو كثير يعني الحمد لله بس اليوم ده تحديداً أنا مكنتش عايزة أسكت  
ومحدثش كان عارف أنا عايزة اي محدش عارف يسكتني مهما جابولي في  
العاب وحاجات حلوة عشان أسكت انا مفيش مش عايز أسكت لغاية مافي حد  
من الأطفال من الجيران ساعتها كان لهم بنت صغيرة تقريباً في سني كده أو  
أكبر مني بحاجة بسيطة جت جنبي وقعدت تطبطب عليا وتقولي معلش معلش  
متعيطيش وأنا سبحان الله سكت معاها مردتش أسكت مع أبي وأمي ولا مع  
حد وسكت مع البنت الصغيرة ديه وأول ما سكت شوية أتلقطت الصورة ديه  
ماصدقو ، عشان كده لو تلاحظي الصورة هتشوفيني مصدومة كده ههه

واكملو تقليب فى الألبوم ووقفت زُلفي' أمام صورة فقالت :

- الصفحة ديه مميزة جداً فيها صور ليا في جميع مراحل تعليمي من أول الإبتدائي لحد ما اتخرجت من الجامعة

عندك ديه مثلاً هنا وأنا تقريباً فى أولى إبتدائي كنت ست سنين شوفي كنت صغونة إزاي وبعدها هنا كنت فى ثانوي كنت ساعتها طولت شوية بس كنت لسة متغيرتش كتير نفس ملامح الطفولة كانت فيا ، وهنا بقى كنت في الجامعة وساعتها أنا وأهلي كنا سافرنا قطر كنت كملت تعليمي الجامعي برة ودخلت كلية الهندسة في جامعة الفرات وما أدراكي ماهي كلية الهندسة صراحة أنا كنت حابة المجال ده جداً بس لما دخلت شفت اللي جواها عرفت معنى أنك تكوني مهندسة على حق ههه بس أنا حبيت التجربة بتاعي اها مهما كانت صعبة ومهما كانت ثقيلة بس أستمتعت جداً فيها ، وهنا برضو في مشروع التخرج قعدت كتير أشغل عليه وسبت اللاب شوية رحنت أعمل حاجة اشربها رجعت لقيت القطة بتاعتي نامت على اللاب ومش عايزة تتحرك ذكريات كتير تخص الجامعة هنا مش هقدر أنساها ذكريات متعبة وذكريات جميلة

وأكملت زُلفي' تقليب ووصلت ل صفحة كانت تظهر فيها صورة بها زوجين فى زفاف وقالت زُلفي' :

- من هنا بقى بدأت حياتي تتغير لـ الأجل ، هنا كان كتب كتابي علي تيم  
كان جواز سريع بشكل ، انا وتيم في غضون شهر واحد كنا جهزنا نفسنا  
عشان نتجوز ومكناش عاملين حسابنا كنا فاتحين المدة بس حصل ساعتها  
مشكلة معايا وكنت متعصبه وكانت ماما معايا وتيم وخطر في بالي فكرة  
وقلتها في لحظتها قلت ل تيم ابيه رأيك نتجوز الشهر الجاي؟ ههه طبعاً امي  
قالت إنني أتجننت بس لقيت تيم بص لي بصة تحدي وقال يلا وانا موافق!  
أمي ساعتها جالها دهشة مننا وقالت العيال دول اتجننو رسمي بس انا كنت  
فرحانة جداً ساعتها فرحت أن تيم موقفش قصادي ولا قال انتي متعصبه  
ياحبيبتني بتقولي اي ، بل بالعكس لاقاني مجنونه قام مشاركني جناني!  
وديه حاجة أنا مش هقدر أنساها أبداً

وتابعت زُلفي حتى وصلت الي صورة فضحكت وقالت ل مريم وهي تضحك  
:

- شايفة انتي الصورة ديه؟

فنظرت مريم وقالت :

- أيوة ده... اي ده هو ماله باصص لك كده ليه؟

فأكملت زُلفي وهي تضحك قائلة :

- تعالي أحكيك الموقف ده ، أحنا كنا هنا لسة متجوزين جداد كان بقالنا شهرين أو ثلاثة وكان هو جاي من الشغل وأنا كنت جهزت العشاء عشان ناكل مع بعض ، المهم وأحنا بناكل خدت بالي انه ساب الأكل وكان باصص لي ، فأستغربت وقتله :

- في اي مالك قاعد بتبص لي في حاجة في وشي ولا ابيه؟

رد عليا وقال :

- لأ أبداً وحرك راسه بالنفي

المهم كملت أكل وفضل هو باصص لي شوية كده وقال أنتي ازاي جميلة كده! وبعدها قالي بالفصحى : "وكأنك تأخذين الورد شهيقاً وتخرجين العطر زفيراً ... أنتنفسين الجمال"

طبعاً أنا أستغربت وأنبسطت وأتكسفت كله في نفس اللحظة ومكنتش عارفة أرد ا قوله ابيه ده؟! بس بعدها جت في دماغي حاجة عشان أتدارك الكسوف ده وإبتسمت إبتسامة صفرا كده ورديت عليه قلت :

- لأ ياعسل!! أنا بتتنفس أكسجين عادي خالص ... ولو مش هتاكل وهتفضل باصص لي هات حنة الفرخة اللي قدامك ديه!!

وأكملت زُلفي ضحك وهي تقول ل مريم :

- طبعاً مقدرش أقولك ابيه اللي حصل طبعاً لقيته هو اللي أتصدم وفضلت  
مركزة على تعابير وشه وكنت عايزة أضحك ، وبعدها لقيته قالي بطريقة فيها  
قرف مصطنع كده :

- تصدقي أنك واحدة فصيلة والله! ، وقام ماسك حته الفرخة وأدهاني وهو  
بيقول :

- كلي ياختي كلي ... كلي وأشبعي ياكش تبقى زي ... وسكت لثواني كده  
وقال : تبقى زي القمر برضو مهما عملتي هفضل أحبك ومش هشوفك غير  
كده بس تقولي اي بقى بحب واحدة دبش

صراحة هنا أنا بقى ضحكت مقدرتش امسك نفسي فحسب إنني بضحك علي  
كلامه وكان هيتقمص فقت وراه وكان داخل البلكونه وحضنته من ظهره  
وسندت براسي علي كتفه وقلت له :

- أنا كنت بضحك معاك مكنتش بضحك عليك مقدرش ده انت حبيبي ، أنا بس  
معرفتش أرد عليك أقولك ابيه علي كلامك القمر الجميل ده ربنا يخليك  
ويحفظك ليا دائماً ياتيم  
وقام حاضني وقالي :

- أنتي مهما عملتي أنا هفضل أحبك أنا معرفش ازاي اتقلبتني وبقيتي فصيلة  
كده بس تمام عادي  
قمت ضاحكة وقلت له :

- أصل انت اللي بتقول كلام حلو وبتكسفي كده اعملك اي يعني ، ثم انت شكلك قعدت كتير تحفظ في البيت بتاع الشهيق والزفير ده هو احنا في حصة علوم ياعم ههه

قام لقيته باص لي وضحك وقال تصدقي إنك.. قمت ضاحكة وجريت رحت جبت الموبايل وقلت يلا نتصور قالي لأ مش هتصور معاكي قلت له طيب عشان خاطري خد واحد شهيق واحد زفير الصورة هتطلع حلوة قام باصص لي البصة اللي انتي شايفاها ديه وقمت لقطت الصورة كل مرة افتح الصورة افكر الموقف أضحك وهو يفكر الموقف يقوم باصص لي البصة الشهيرة بتاعته حبيب قلبي اللي مستحملني ربنا يخليه ليا يارب ، وتعالى نكمل تقليب...

وبعد بضعة صفحات وصلت زُلفي ل صورتها وهي حامل وفي يدها قطعة قماش صغيرة ل مولودتها ، وقالت :

- هنا أنا كنت حامل في بنتي وحبيبتي "أماني" في الفترة ديه حصلت حاجات كتيرة أووي وكانت تجربة لا تنسى إطلاقاً من أول يوم عرفت فيه اني حامل طبعاً انتي عارفة اني كنت شغالة وبعد ما عرفت الخبر استنيت لما تيم رجع هو كمان من الشغل وأحنا قاعدين بنتعشي أنا كنت بيتسم وفرحانة مش عارفه اقله ازاى المهم هو لقاني بيتسم كده فقام قالي :

- اي اللي مفرحك أووي كده مخليكي مش عارفة تاكلي

- أنا مش عارفة والله اجيبها لك ازاي؟!!

- فيه اي طيب قولي

- انت هتكون أب!!

جبتها له فجأة كده وهو كان بياكل قام الأكل وقف في زوره وقعد يكح وانا

جبت له مياه يشرب وبعد ما شرب قعد يكح ويقولني :

- انتي الله يهديكي في حد يقول لحد خبر بالمنظر ده؟!!

بعدها رجع وأستوعب الموقف وقام باصص لي وقال :

- انتي قلتي ابيه؟ انتي قولتي اني هبقى أب؟

- أيوة أنت هتبقى أب أنا حامل ياتيم!

هنا بقى انا مقولكيش هو عمل ابيه قام حاضني وشالني وقعد يقول أنا هبقى

أب أنا هبقى أب وأنا بقوله طيب أهدى ونزلني وبعدها قام منزلني علطول

ومسك بطني وقالني :

- أنتي من هنا ورايح ترتاحي مش عايزك تتعبي نفسك خالص وتاخدي إجازة

من الشغل فترة الحمل عايزك ترتاحي على الآخر عشان خاطر البيبي أنا

بكرة هروح وهعم..

بعدها حطيت أيدي علي بوقه أحاول أسكته واهديه شوية وقلت :

- يا حبيبي أهدى مالك في اييه إجازة اييه اللي اخدها من الشغل من دلوقتي  
طيب على الأقل كمان شهرين ولا حاجة مش دلوقتي وأنا قدامك أهو كويسة  
وزي القرد ثم ثانياً أنا مش بحب القعدة بزهدك بسرعة انت متقلش عليا أنا  
هكون كويسة

قعد باصص لي كده شوية ورد قالي :

- انتي حامل أنا مش مصدق

وقام حاضني تانى وانا قعدت اقوله خلاص بقى عايزة أروح أبشر أهلي مش  
ههرب منك يعني

قام فضل ماسك فيا وقال :

- خليني أفضل خاضنك شوية معلش

وبعدها بشوية سابني ورحت أبشر أهلي وفضل باصص لي وانا بكلمهم وبعد  
ما خلصت قلت له مش ناوي تكلم أهلك تبشرهم... قعد باصص لي مش بيرد  
لحد ما انتبه وقالي اه طبعاً هتصل دلوقتي أهو

تيم كان طاير من السعادة ومكنش مصدق وفضل فترة مش دريان بحاله من  
فرحته وفي الصورة ديه أتصورت وانا داخلة أوضة العمليات فى المستشفى  
اللي حصل فى المستشفى كتير أووي

كان الحمل بتاعي في آخره كان صعب شوية وكنت تعبانة أووي الفترة ديه  
وجسمي ضعف شويتين ، أمانى كانت زعلانة منى باين ساعتها المهم وانا في  
المستشفى الممرضة جت دخلت عليا وهي بتبتسم وبتقولي :

- جوز حضرتك المستشفى كلها عرفته

فرديت وقلت لها بأستغراب :

- ليه يعنى

ردت عليا وقالت :

- جوز حضرتك لما كنتي بتكوني تعبانة وبنقوله لو يروح يرتاح في بيته  
شوية ويجي مكنش بيرضى وبينزل الكافتيريا تحت يقعد فيها ل الصبح يقرأ  
في القرآن ويقعد يدعيلك وامبارح لقيته بيوزع على الأطفال اللي في  
المستشفى "بنبوني" وبيقولهم متنسوش تدعوه لحبيبتى زُلفي! انها تولد بالسلامة  
وكان اي حد محتاج اي مساعدة كنا علطول بنلاقيه معانا وماشي يقول ل اي  
حد أرجوكم ادعول حبيبتى زُلفي! انها تقوم بالسلامة هي وبنتي ، بجد اللهم  
بارك ربنا يخلي لك جوزك بجد ياريت كل الرجال شبه الف سلامة عليك

أنا سمعت الكلام منها ولقيت نفسي بعيط والله مش عارفه أقول اي ، أشكر  
ربنا علي وجود تيم ولا أدعي ربنا انه يخفف عني عشان أسعده وأقوم  
بالسلامة أنا وأمانى ونجتمع مع بعض بإذن الله

وبعد ما خلاص اتحددت يوم العملية تيم كان معايا خطوة بخطوة لغاية ماقالهم  
:

- أرجوكي خليني أدخل معاها أوضة العمليات يادكتورة
- يافندم يا أستاذ تيم مرات حضرتك بإذن الله هتولد بكل سهولة ومش هيكون في مشاكل ولا قلق حضرتك مش محتاج تدخل معاها والله
- أرجوكي أنا مش عايز أسببها لوحدها خليني أدخل معاها بس أرجوكي
- قعد كتير يترجى الدكتورة انه يدخل معايا لحد ما وافقت وبالفعل دخل معايا بس شوية صغيرين وقامو طلعهو والحمد لله العملية مأخذتش كتير وقامت أمانى جت الدنيا

أول ما مسكتها فى حضنى عيطت!

عيطت جامد أووي خرجت تعب ٩ شهور خرجت كل مشاعري وانا بعيط ،  
أنا كنت فرحانة وقلقانة وخايفة ومبسوطة ومش مستوعبة انى بقى عندي بنت  
وبنتي فى أيدي دلوقتي!

سمعت نبضات قلبها الصغير وحسيته مسكتها وبوستها من رأسها وقلت "  
ربنا يحفظك يا أمانى ويحميك ويجعلك من السعداء فى الدارين اللهم آمين "

بنتي وحببتي أمانى البكر بتاعتي أنا وتيم

أمانى من وهي صغيرة إتولدت صغيرة وهزيلة شوية جسمها كان صغير عن الطبيعى وفى ناس خوفونا وقالو لنا انها ممكن تموت ، بس أحنا مسمعناش كلامهم وفضلنا نحب أمانى أكثر وأكثر ، ومع مرور الوقت وأمانى بتكبر أنا كنت شايفها هادية مش اجتماعية بالشكل الكبير ، أصدقائها قليلين مش بتصاحب اى حد بسهولة ، لما كبرت ووصلت ل الثانوى كانت صغيرة اللي يشوفها ميدهاش ١٠ سنين بس هي مكنتش بتحط في دماغها كان في بعض الزملاء في المدرسة معاها بيتريقو علي طولها وانها شكلها صغير في عز ما كل اصحابها اكبر وأطول منها

بنتي كانت حساسة بشكل كبير جداً كانت بتسمع الكلام ده وكانت بتحاربه ، كانت أيوة بتتأثر بيه وكانت بتكون تحت ضغط أنا كنت بساعدها وتيم كان بيسمع منها بس هي كانت دائماً بتحب تظهر قدامنا بمظهر القوة مكنتش بتحب أبداً تبان ضعيفة بس انا أمها عارفها كويس وكنت مبحبش اضغط عليها بس كنت دائماً بقولها أنا دائماً معاكى وفي صفك لو أحتجتى في اى وقت تيجى تتكلمى معايا هتلاقينى دائماً مستناكى ، كنت دائماً بكرر علي مسامعها انى بحبها وانها أعز حاجة عندي وأنها دنيتى وأن سعادتها هي سر سعادتي ... مهما هكلمك عنها مش هقدر أبين لك مدي حبي ليها

وعشان كده انتى واخدة منها كتير اووي يامريم واخدة الشغف والقوة منها ، مهما اتكسرتى ومهما الناس أذوكم هتفضلو واقفين زي الأسود ، مهما كان

جواكم من مشاكل ودمار أنتم راية وقدوة لغيركم أنتم عندكم إحساس  
بالمسؤولية من وأنتم صغيرين أنا فخورة بوجودكم في حياتي والله

فردت مريم قائلة :

- أحنا اللي فخورين بوجودك انتي في حياتنا يا قمر ربنا ما يحرمننا منك أبداً

واكملو تقليب في الألبوم حتي وقفت زلفي أمام صورة وقالت :

- الصورة ديه بقى ليها موقف مقدرش انساه أبداً

في فترة كده حصل موقف مع تيم وزعلت منه وهو مجاش حتي يجبر  
بخاطري ويتعذر لي وأحنا كنا متفقين وأحنا لسة متجوزين جداد أننا لما نزل  
من بعض هنده على بعض بـ أبو فلان وأم فلان بأسامي ولادنا يعني وديه  
هتكون زي إشارة أن واحد فينا زعلان عشان محدش يسيب شريكه زعلان  
منه لو واحد مننا مكنش قادر ولا عارف يقول ل شريكه أنه زعلان منه

المهم في يوم كنا في عزومة عند أهل تيم أمه كانت عازمنا وكانت عازمة  
ناس كثير والبيت كان زحمة وأحنا كنا شغالين بنعمل الأكل أنا وحماتي  
والبنات المهم أنا كنت تعبانة اليوم ده وكنت جاية على نفسي عشان أقدر أقف  
معاهم وكده وبعدها لم خلصنا الأكل كنت صراحة جبت أخرى فقلت أريح

حبتين وكده في أوضة الأولاد عقبال ما يحطو الأكل ، ولما خلصو ندهو عليا  
بس مكنتش قادرة أتحرك خالص فحماتي جت لي الأوضة فأعتذرت منها جداً  
وقلت لها أنا شوية كده وبإذن الله هقدر أقوم وأجي ، وبعدها هما بدأو الأكل  
من غيري وأنا فضلت قاعدة في الأوضة وكنت جعانة صراحة وأضايقت  
كمان من تيم! عارفة ليه؟ عشان هو حتي مجاليش يسألني مجيتيش ليه ولا جه  
حتي جبلي الأكل هنا نقعد ناكل سوا وإنه قعد كلّ معاهم عادي من غيري  
وسابني لوحدي هنا

المهم بعد ما قامو وخلصو أكل أنا مكنتش عايزة أبين لهم اني زعلانة  
ومتضايقة من حاجة وحاولت اعدي الموقف بس تيم حس اني مضايقة فقرب  
مني وقالني :

- انتي زعلانة من حاجة يا زُلفي!

لا والله! وكمان بتسألني.. قلت كده في نفسي وقلت له :

- لأ مش زعلانة منك أنا بس تعبانة شوية شكلي

وبعدها حماتي كانت بتنده على تيم وهو مكنش سامعها فقلت له :

- ماما بتنده عليك يابو أمانني!

فبص لي ومردش بس هو اتأكد اني خلاص متضايقة منه كده وراح يشوف  
أمه كانت عايزة منه أي

بعدها وأحنا ماشين تيم قالي إنه هياخد الأطفال وهينزل يسبقني وبعدها نزل وأنا كنت كنت بجهز نفسي وهنزل لقيت حماتي بتجري عليا وأنا خلاص على عتبة الباب وبتديني شطنة كبيرة كده في كمية حلوة من الأكل وكان لسة سخن من شوية وبتقولي :

- معلش كنت هنسى اديكي الأكل انتي مكلتيش حاجة خالص وكمان تيم محطتش لقمة فى بوقه!

استغرب جداً وقلت لها :

- ازاي يعني هو مش قعد كل معاكم؟

ردت وقالت :

- لأ يابنتي مرداش يأكل لما عرف أنك تعبانة ومش قادرة تاكلي مرداش ياكل هو كمان من غيرك ولما حاولنا ننده عليك عشان تيجي قال خلاص متضغطوش عليها أنا هاكل معاها لما نروح هي تعبانة دلوقتي سيبوها وكلنا فضلنا نزن عليه حتى لو ياكل لقمة صغيرة بس مكنش عايز خالص ، فدخدي الأكل أهو سخنته لك أول ماتروحي أقعدي كلي انتي وجوزك

انا سمعت الكلام منها وأنا مش مستوعبة طيب هو مقاليش حاجة ليه ، لأ وكمان أنا اتضايقت منه وزعلته وعرفته اني زعلانة منه

نزلت وأحنا في الطريق كنت قاعدة ببص له وهو سايق لحد ملاحظ وقالي :

- هو في حاجة فى وشي ولا اي؟

قلت له :

- لأ... لأ مفيش

ولما روحنا ونيمت العيال خرجت لقيته قاعد في الصالون رحت قعدت جنبه  
وفضلت أبص عليه من غير ما أتكلم مش عارفة ابدأ كلامى بـ اييه ، بص لي  
وابتسم وقالني :

- عينك بتلمع أووي دلوقتي وده معناه أنك عايزة تتكلمي وتقولني حاجة وأنتك  
في حالة من اللغطة العاطفية ومحتاجة حاجة واحدة بس دلوقتي ...

وبدون مقدمات قام حاضني!!

وقال :

- أنا شفتك نازلة من عند ماما بالأكل ف فهمت إنها قالت لك ولما فضلتني  
تبص لي طول الطريق اتأكدت أنك حاسة بالذنب وعايزة تتكلمي ودلوقتي  
انتي عايزة تتكلمي وتقولني بس مش عارفة ، فد أنا أختصرت عليكي المشوار  
وعملت اللي بكل الكلام

أنا وأنا في حضنه وإيدي علي ظهره شديت عليه وقلت له :

- أنت ليه مقلتلش أنك مكلتش؟ ومكلتش ليه أصلاً! شكلك قدام الضيوف

هيكون عامل ازاي وانت مش بتاكل ووالدتك كان ممكن تزعل؟

قام قالي بكل هدوء وهو بيمسح علي راسي :

- أولاً أنا مش بيفرق معايا شكلي قدام الناس طظ في اي حد حرفياً ثانياً أنا

قلت ل أمي وهي فهمت الوضع وتقبلته عادي جداً ثالثاً بقى وده الأهم

عندي... وقام ماسكني من خدودي وبيمسح في دموعي وقال :

- أنا مقدرتش أكل وحببتي جعانة وقاعدة لوحدها جوه ومعلش بقى أنا مكنتش

عايز أكل من ايد حد غيرك!

أنا عيني مقدرتش امسكها صراحة وقمت حضنته جامد اوي وقلت له :

- أنا بحبك أووي ياتيم ، أنت كنت بتفكر فيا ومردتش تأكل عشاني وعشان

متسبنيش لوحدي ، أنت كنت عارف انا هفكر ازاي ولما زعلت منك وقلت

لك ، انت مقلتلش حاجة ولا رديت تعمل حاجة غير اما رجعنا... ربنا يخليك

ليا ياتيم علطول ولا يحرمني منك أبداً

قام قالي :

- طيب يلا كفاية حب وغرام بقى معدتي عمالة تصرخ عايزة تأكل

قمت وسخنت الأكل وحطيته على التراييزة ولسة هياكل قمت قلت له :

- لأ استني متاكلش عايز اصور اللحظة ديه

قام ضاحك وقالى :

- تصوري اى بقولك جعان جداً يابت تعالى هنا يلا كلي

جريت أجيب الكاميرا ولما جيت اصور لقيته قام رافع حته الفرخة بعد ما قطم

منها حته وببيبتسم إبتسامة سمجة على الآخر قمت ضحكت على ريكأشنه

وقمت لقطت الصورة اللي قدامك ديه يامريم

اييه رأيك بقى اهي ديه واحدة من أعز الذكريات على قلبي مقدرش انساها

أبدأ

وأكملت زُلفي' تقليب فى الألبوم الضخم وظلت تروي ل مريم بعض القصص

الطيفة والتي بها الكثير من المواقف المضحكة والأخرى المزعجة حتى

وصلت الي صفحة بها صورة شابة ترتدي الفستان الأبيض الخاص بـ الزفاف

وقالت زُلفي' :

- طبعاً انتي عرفتي مين ديه؟

فردت مريم قائلة :

- ومين يقدر ميكونش عارف أجمل واحدة لبست فستان أبيض خلاها تكون  
زي الملاك! أمي الجميلة وأبي حبيبي

فتابعت زُلفي قائلة :

- تعالي بقى احكي لك عن الفترة ديه وإزاي أماني قابلت عمر واتجوزو في  
نهاية المطاف

فلمعت عيني مريم إذ انها ستعرف كيف قابل والدها والدتها وتعرفو وتزوجو  
فقالت زُلفي :

- لما أماني كانت في الجامعة وتحديدًا كانت في سنة رابعة وخلص هتخرج  
من كلية الآداب اللي هي اختارتها على الرغم انها كانت جابت مجموع يدخلها  
طب او هندسة بس هي مكانش حابه الكليات ديه واختارت تدخل حاجة هي  
بتحبها وكانت بتقول انها مش لازم تمشي نفس الطريق اللي احنا مشينا فيه انا  
وأبوها وإنما هتعمل طريق جديد لوحدها تمشي فيه ويكون بتاعها هي ...  
المهم في سنة رابعة كانت بتمر بمشاكل في الدراسة ومع الدكاترة كانت دايمًا  
معترضة على طريقة شرحهم وعلي طريقتهم في التعامل مع الطلبة وفي  
وضع المناهج اللي علي كلامها ساعتها غير متطورة وغير مواكبة الأحداث  
والتطورات كانت دايمًا عندها جموح ومش بتقبل ب أي حاجة كان لازم تقتنع  
بشكل تام والا استحملو اللي هي ممكن تعملو المهم في يوم الكلية طلعت بيان  
ان في حاجة زي ندوة أو إيفينت بس إجباري لبعض الكليات وللفرق النهائية  
بس عشان الأعداد يعني وكده وهي كانت من الطلبة البارزين والمتفوقين فـ

عشان كده كانت من المدعوين إجباري لـ الايفينت ده وكان معاهم كام كلية  
برضو هتروح وفي اليوم المحدد ده حصل مشكلة المبني اللي هيتم إقامة  
الايفينت فيه الأمن محدش كان أخطرهم بأي حاجة فالنتيجة أنهم مسمحوش  
لحد انه يدخل عقبال ما يتم التواصل مع ادارتهم انهم يدخلو ، والكلام ده كان  
قبل ما أمانى توصل مع صديقتها وبعد ما وصلت لقت المشكلة ديه قدامها..  
تسكت! قامت عاملة مشكلة واتخاقت مع الأمن والموقف كان صعب على  
الأمن اكثر من اي حد عشان هي على اللي انا فاكره ان صديقتها حكته ليا  
أنها راحت ل الأمن وقالت له :

- هو حضراتكم موقفين الشباب قدام الباب ليه كده؟

- حضرتك أحنا محدش كان قايل لنا أن في اي إيفينت في المبني عندنا والعدد  
كبير اننا ندخلكم كلكم ف أحنا مستنين اي تعليمات من الإدارة بتاعنا وبعدها  
نشوف هنعمل اي

- يعنى حضرتك دلوقتي اللي انا فهمته أنك هتوقفنا قدام الباب زي الحيوانات  
تحت الشمس عشان حضراتكم انتم وأدارتكم مش عارفين توصلو لبعض  
معلومات في الشغل بتاعكم صح؟!!

- انتي بتقولي اي يا أستاذة مين دول اللي مش عارفين يشتغلو صح خلي بالك  
من كلامك بعد إذنك

- يعني انت مسمعتش غير انكم مش عارفين تشتغلو ومخدتش بالك انكم  
هتوقفونا زي الحيوانات في الشمس صح؟!!

- يا أستاذة أحنا منتظرين التعليمات وهنبلغكم بيها أول ما تيجي

- لأ يافندم أحنا مش هنستني التعليمات بتاعتكم اللي هي المفروض أصلاً  
تكون عندكم التقصير بتاعكم ده أنتم اللي تتحملوه مش أحنا تمام ، وأحنا مش  
هنستني تحت الشمس يا اما تدخلنا دلوقتي المبني ياما هنروح أحنا بنفسنا ل  
إدارتكم ونقدم فيكم شكوي وصدقني أحنا مش بنهزر وبأكذلك انكم اكثر حد  
هيتأذو وأحنا فينا من كلية حقوق محامين ودكاترة كبار محدش فيهم هيسمي  
عليكم

صاحبة أمانى حلفت ليا ان فرد الأمن اللي سمع منها الكلام وشه أصفر  
ومعرفش ينطق وقالها انه هيجيب المشرف بتاعه يكلمها عشان هي مصممة  
ومش عايزة تسمع

ولما المشرف جه كلم أمانى كان بيكلمها بشكل لبق جداً مش بيكلم طالبة في  
كلية ده بيكلم شخصية ثقيلة وبيكلمها بكل رسمية وبتفهم وبهدوء عكس الفرد  
الجاهل ده وأمانى شافت برضو انها بتكلم شخصية أعلى شأن من اللي قبله  
فكلمته بهدوء بس بحزم برضو وتفاهمو مع بعض ان الطلبة احنا نقدر ندخلهم  
القاعة المفتوحة بدل ما هم واقفين في الشمس وده اقصى حاجة نقدر نعملها  
وكله على كلمة من أمانى ان الجروب كله هي المسؤلة عن أي تصرف  
مشاغب منهم وهي وافقت وبالفعل دخلو القاعة المفتوحة وهي قاعدة بتراقب  
اي حد ليعمل حاجة كده ولا كده ف صديقتها بتقولها :

- انتي اي اللي عملته ده؟! -

- كنت أعمل اي طيب مكنش قدامي غير كده الاختيارات بتاعتى كانت محدودة ومكنش عندي غير اني اساير الموقف واديني هنا اهو بقيت مسؤلة عن المئات من الطلبة!

- طيب وانتي ليه وصلتي لغاية كده كان ممكن من الأول تمشي

- امشي؟ ليه أن شاء الله يعني أنا جيت أصلاً مجبرة وكمان الاقيهم مش عايزين يدخلونا ده حقي وأنا أكيد مش هسمح لحد انه ياخده غضب عنى ، ده مش أنا

وبعدها مشرف الأمن جه ل أمانى وقالها :

- لسة دلوقتي جاي لي التعليمات بأن المفروض في إيفينت انهاردة عندنا بس حصل مشكلة عندنا أحنا والمفروض الخبر ده جالنا من يومين بس أحنا بنتأسف لحضرتك على المشكلة اللي حصلت الصبح وعلى الوقفة

- لأ حصل خير آدام أنتم اعتذرتم يبقى انتم شفتم أن الغلط كان من عندكم مش من عندنا ف ده بالنسبة لي كافي

فضحك مشرف الأمن وقال :

- وأحنا ممتنين ل قبولك اعتذرتنا وبوعدك مش هتكرر تاني

- متفلقش أن شاء الله مش هنيجي تاني

- مش لازم هنا

فبصت أماني له وهو بيبتسم وماشي وقالت لـ صاحبته :

- ده قصده اي الراجل ده؟

- ياستي فكك

وبعد اليوم الطويل ده كله رجعت أماني وهي بتقولنا علي بطولتها انهارده  
وازاي هي انتصرت عليهم وكانت زي الأسد ومسابتش حقها ووقفت قدامهم  
وشافت نظرة الهزيمة علي وشوشهم لما اعتذرو لها ، كانت طايرة من  
الفرحة

المهم بعدها بكام يوم وهي خارجة من الكلية هي وصديقاتها قابلت مشرف  
الأمن بتاع الايفينت واقف قدام الكلية وأول ما شافهم قام متقدم ناحيتهم ووقفهم  
وقال :

- مش عارف حضرتك هتكوني لسة فاكرني ولا لأ

- لأ فاكراك انت مشرف الأمن اللي أعتذر لي!

قام ضاحك الشاب وقال :

- أيوة انا اللي أعتذرت لك أنا هو

- أيوة حضرتك عايز اي؟

- كنت عايز أسألك سؤالين بس؟

- معلش أنت مين أساساً عشان تسألني؟!

- طيب ثانية بس استهدي بالله انا هقولك انا مين الأول وبعدها هقولك  
السؤالين أولاً انا اسمي عمر عبدالعزيز والسؤالين اللي كنت عايز اسألهم  
لحضرتك انا هختصرهم في طلب واحد بس عشان متضربنيش... ممكن لو  
حضرتك مش مرتبطة ولا مخطوبة ولا اي حاجة من دول تديني رقم والدك  
اكلمه؟!

طبعاً أمانى انصدمت من الطلب واستغربت مين الراجل ده وازاي يجيب  
الجرأة انه يطلب كده في الشارع عيني عينك  
ردت عليه وقالت له :

- انت بتهزر يا أستاذ؟! في حد يوقف بنت في الشارع ويقولها عايز رقم  
أبوها؟

- هو انا عملت حاجة غلط طيب؟!

- ثم ثانياً انت أصلاً جبت الجرأة انك توقفني مينين؟

- حضرتك انا جيت بس اطلب منك رقم والدك لا أكثر ولا أقل وملقتش  
طريقة غير ديه بما اني معرفش عنوان بيتكم ولا اعرف لكم سبيل فقلت اطلبه  
بشكل مباشر واتمني اني مكنتش عملت حاجة تضايقتك؟

- لأ يافندم ضايقتتي وبعد اذنك ابعد عن الطريق عايزين نمشي ولا كمان  
هتمنعنا اننا نمشى!؟

قام أبتسم هذا الشاب عمر وقال وهو يبعد :

- اتفضلي طبعاً مقدرش وأنا آسف لو ضايقتك بالطلب بتاعي

ثم نظرت له أماني وهو يبتعد وهي تقول لصديقتها :

- شوفي الواد قال أي جه يوقفني ويطلب رقم بابا اي البجاجة ديه؟ انتي ساكته  
ليه يامروة

نظرت لها صديقتها وقالت :

- يا حبيبتي الراجل معملش اي حاجة غلط خالص ده جيه وبكل أدب وصراحة  
ووضوح طلب منك رقم أبوكي عشان عايز يتقدم وقالك كمان لو انتي مش  
مخطوبة او كده انا شايفها معملش اي حاجة تستدعي كل العصبية والشد اللي  
قابلتني بيها الراجل بجد!

ثم قالت أماني في نفسها هو انا بجد ممكن أكون افورت معاه بس هو اللي  
فاجئتني صراحة ، لأ انا مش هندم انا عملت اللي قدرت اعمله في موقف  
مفاجئ زي ده مفيش مشاكل بقي

وبعد عدة أيام وفى المساء أمانى كانت قادمة من الجامعة الي البيت وهي منهكة الإمتحانات اقتربت ولا بد ان تذاكر بشكل مكثف وتراجع على المواد الدراسية مجدداً وهاكذا

وحين رجعت الي المنزل وجدت حذاء ل رجل غريب أمام عتبة الباب فأندهشت حتي فتحت الباب ودخلت الي غرفة الضيوف لتتفاجئ بشكل أكبر حينما رأت ذلك الشاب مجدداً نعم انه هو مشرف الأمن ماذا كان اسمه.. نعم عمر ، وجدته يجلس مع تيم وحين رآها ابتسم فقالت بكل تلقائية :

- انت بتعمل اي هنا؟

فنظر تيم الي ابنته متعجباً وقال :

- في اي يا أمانى ، في حد يقول كده لضيف!

- مش قصدي يا بابا بس الرجل ده أنا بس... هو ضيف حضرتك؟

- أيوة يا أمانى الرجل ده الضيف بتاعي؟ أنتي تعرفيه؟

فنظرت له أمانى نظرة بها من التعالي قليلاً وقالت :

- لأ يا والدي معرفوش! استأذنكم

ودخلت أمانى غرفتها وهي مستغربة كيف يمكن لهذا الرجل أن يأتي الي منزلها لقد طلب منها رقم والدها والآن يجلس معه! ياله من رجل ماكر!

وبعدها ذهب عمر وخرجت أمانى لتتكلم مع والدها في العشاء قالت :

- هو يابابا الراجل اللي كان هنا ده كان عايز منك اي؟

- في اي يا أمانى مالك؟ انتي من أول مادخلتي قلتي ل الراجل انت ازاي

هنا؟! ودلوقتي بتسأليني عنه في اي؟

- مفيش يابابا انا بس قلت أسألك أصل أول مرة اشوفه هنا يعني هو ده

صديقك ولا اي؟

- لأ ياستي مش صديقي ، في الحقيقة الراجل ده جه عشان يطلب إيدك مني؟

وهنا تركت أمانى الملعقة من يدها ونظرت الي والدها وقالت :

- مين ده اللي عايز يتقدم؟ الراجل اللي كان معاك؟

- أيوة هو... أنا قعدت اتكلم معاه وعرفت عنه شوية حاجات قلت له طيب

اديننا فرصة نفكر ونديك بإذن الله خبر بس يعني ف انتي اي رأيك؟

- رأي في يا أبي انا لسة صغيرة على الإرتباط ولسة لما أخلص الكلية اللي

انا فيها ديه ابقى ساعتها أشوف

- طيب ما انتي خلاص في الباكاليوس يابنتي هتخلصي بعد كام شهر خلاص

- بس يابابا برضو أنا لسة عايزة أعمل ماجستير ودكتوراه لسة في شغل كثير

لسة قدامي



وبعد أسبوع أتى اليوم الموعود وأمانى في غرفتها تجهز نفسها للقاء هذا الشخص الغريب الذي ظهر فجأة وقرر الزواج منها وهو حتى لا يعرفها... سوف أريك اليوم من أكون على الحقيقة

في صمت طال قليلاً قرر هو كسره حين قال :

- إنتي معندكيش أي سؤال عايزة تسألينه لي؟

- لأ في صراحة... أنت إزاي جيت تطلب أيدي كده؟!

- ازاي؟ مش فاهمك إزاي يعني جيت لوالدك و..

- لأ مش ده قصدي انا بقصد أنت اخترتني ازاي وليه ثم انت تعرفني أصلاً ولا لأ عشان كده سألتك انت إزاي جيت تطلبني

- أنا بالفعل معرفكيش وأخترتك ليه وإزاي ديه بقى أنا صراحة مش عارف أجابك عليها ازاي بس تقدري تقولي أنا شفتك أول مرة وشفت ردة فعلك علي موقف وتابعت الموقف ده لحد ماقابلتك واتكلمت معاكي وساعتها أنا أتأكدت! أنا كنت بدور عليك من زمان أووي يا أمانى

- أنت بنتكلم على اي؟ أنهى موقف انت بنتكلم عن موقف الايفينت بتاع الجامعة؟ بجد!

- أيوه أنا لما شفتك اليوم ده وأنا اتلغبطت انا ماعمرى ماحصلى كده قبل كده  
أنا أول مرة حد يهزمنى زي ما انتي هزمتني اليوم ده بس ديه كانت أجمل  
هزيمة في حياتي

كانت تنظر له أمانى وهي متعجبة ولا تعرف ماذا تقول له حين رآها فتابع  
قائلاً :

- بصى انا مش بعرف أقول كلام حلو ولا ليا في تجميل الكلام والكلام  
الرومانسى وده بس أنا صريح... أنا حبيتك يا أمانى وعايزك تديني فرصة  
عشان أعرفك أكثر وتعرفيني وعايز أتجوزك  
- أنا كنت بقول عليك أنك غريب ظهرت فجأة كده بس دلوقتي أنا أتأكدت انك  
بجد غريب أووي يا عمر

- أول مرة تنطقي أسمي... أنا حبيت أسمي أكثر دلوقتي  
- طيب أنا هستأذن أنا بقى وأخلي بابا يجي يقعد معاك  
- اتفضلي أذنك معاكى أكيد

وفى المساء جلست زُلفي مع ابنتها وقالت :

- ها اي رأيك فى عمر؟

- رأيي عادي يعنى لا هو حلو ولا هو وحش؟

- أيوه يعني أنا أفهم اي دلوقتي؟ الواد عاجبك ولا لأ؟

- هو غريب يا أمي ده الوصف الوحيد اللي أقدر اقله عليه!

وهنا تدخل تيم فى الحوار قائلاً :

- أنا قلت له يدينا مهلة يومين كده ولا حاجة نسأل عليه ونستخير ونرد عليه

بعدها

- تمام يابابا

نظر إلى ابنته وقال :

- انتي تقبلتيه يا أماني ولا لأ

- هو أنا في الأول صراحة مكنتش متقبلاه بس بعد كلامه معايا يعني أقدر

أقول اني ارتحت شوية بس لسة برضو أنا معرفش حاجة عنه ولا عن حياته

- تمام أحنا معانا لسة وقت نعرفه ونسأل عليه وهو صبور يعني ومش

مستعجل على حاجة

- اللي انت شايفه يابابا

وبالفعل إحنا عملنا خطوبة وبعدها بشوية بعد التخرج بتاعها رحنا واشترينا

الشبكة والصراحة مقولكيش يامريم ، أماني عملت اي في عُمر كانت مطلعته

عينه صراحة وكانت طلباتها كثيرة وكانت بتتدلل كثير عليه وهو حابب ومفيش مشاكل معاه ومهما كانت طلباتها كثيرة ورخمة هو مكنش بيرفض لها طلب لحد في مرة طلبت منه انه يجيب لها نوتة معينة للكتابة النوتة ديه كانت بتباع في دولة تانية وبتتجاب أونلاين بس بملبغ كبير بسبب الشحن والجمارك وكده وهي كانت بتطلب منه عشان كانت فاكرة انه هيرفض لصعوبة الطلب المرة ديه ومش هيقدر يجيبها لها وهي كانت قصدتها بالحركة ديه أنها مش لازم كل اللي تطلبه هو عليه تنفيذه يفكر ويتناقش معاه الأول ديه كانت وجهة نظرها... بس بعدها بفترة وفي عيد ميلادها لقيته جاب لها النوتة!

قالت له :

- انت ازاي جبتها؟!!

رد عليها وقالها :

- هو مش انتي طلبتيها وانا جبتها لك

ومن ساعتها وهي اتأثرت من اللي هو عمله بس نكدت عليه ساعتها! انه ازاي يصرف المبلغ ده كله علي طلب صغير ميستاهلش بس هو رد عليها ساعتها وقالها :

- لأ يستاهل آدم انتي طلبتيه يبقي يستاهل انتي لو طلبتي القمر اجيبه لك

مهما عملت فيه هو موافق وعلى قلبه زي العسل عشان كده هي حبته... هي  
حبت إصراره على أنه يسعدها وإنه يعملها كل اللي هي عايزها وإنه دائماً  
جنبها وبيدعمها وبيستحملها مهما كانت  
والصورة اللي قدامك ديه من الفرح بتاعهم شوفي كانت سعيدة ازاي وهي  
بتتجوز واحد حارب كتير عشانها و وصلها فى النهاية

- إنتي زهقتي وتعبتي من الكلام ولا نقوم ناخذ بريك صغير كده

قالتها زُلفي لـ مريم التي بدت مرهقة قليلاً ، فقالت مريم :

- لأ أنا متعبتش أنا مستمتعة جداً من الكلام ده ومستحيل أزهد ولا أتعب منه  
، لو أنتي تعبتي خلاص ناخذ بريك شوية

- تمام نرتاح شوية كده ونرجع تاني ولا نقوم نساعد شوية في البيت الأولاد  
هيجو كمان شوية والبيت هيزحم ومش هيبقي معانا وقت نعمل حاجة خالص

وقامت زُلفي وظلت مريم جالسة ومعها الألبوم الضخم وقلبت بعض  
الصفحات حتي آتاها صوت ينادي عليها فتركت الألبوم مفتوح وذهبت...  
وفى مساء اليوم في بيت تيم و زُلفي اجتمع الكثير من الأفراد والأطفال  
الصغار وبعض أصدقاء زُلفي يحتفلون بـ عيد مولدها لقد فرحت زُلفي كثيراً

حتى خرجت مريم بين الحشد وكانت ممسكة بكأس العصير وترن علي  
الكأس وتشد الإنتباه حين قالت :

- أيوة أيوة... الكل سامعني الكل شايفني... أنا بس حبيت أقول كلمة صغيرة  
كده بمناسبة اليوم الجميل ده أولاً بشكر الجميع على حضوركم اللطيف وحابة  
أقول لحبيبة قلبي وصديقتي وأمي الثانية جدتي زُفِي كل سنة وانتي طيبة  
ووسطينا ومنورة حياتنا يا أجمل هدية وأرق وأطيب شخص في عيلتنا كل  
سنة وانتي جميلة ورقيقة يا قلبي... وديه هدية بسيطة مني ليكي

وسط تسقيف من العائلة وتهاني الجدة والمزاح بينهم ذهبت مريم من وسط  
الحشد الي البلاكونة الواسعة ووقفت هناك تستنشق الهواء البارد وتنظر الي  
سماء الليل قليلاً

- كنت عارف إني هلاقيكي هنا

قالها تيم وهو يدخل الي جانب مريم حين قالت :

- بحب أقف بليل واتفرج على السماء وأشم الهواء وأبص علي القمر ، القمر  
انهارده بالمناسبة بدر بص كده

فنظر تيم الي السماء وتحديداً الي القمر حين قال :

- أنتي عارفة يامريم القمر ده له حكاية غريبة أووي ، دايماً لوحده مع أنه  
جميل إزاي! الناس كلها بيشبوهو بحبايبهم وهو الوحيد اللي ملوش حبيب ،

أحياناً تلاقية منور بدر وأحياناً يكون هلال وأحياناً مختفي هو أكبر وأحلى  
نجم في مجموعته ولازال برضو لوحده! بس انتي عارفة ليه؟

عشان هو عارف أنه في كتير معتمدين عليه ومعتمدين علي ظهوره وعلي  
وجوده وأنه لو فكر في نفسه وقال أنا زهقت أنا علطول لوحدي النظام كله  
هيقع هو علي الرغم من كونه وحيد ولكنه أبدأ ما كان لوحده هو عارف ده ،  
وده اللي مخليه لازال موجود ولازال منور للكل امتي ما أحتاجه هيلاقوه  
علطول

ثم نظر إلى مريم التي كانت تنظر اليه في تمعن وقال :

- اي مالك بحلقتي ليه كده انتي مفهمتيش انا كنت بقول اي صح؟! ولا يهملك  
كنت بقول كلام ملوش معنى برضو

- لأ خالص والله أنا شايفة أن كلامك جميل جداً ومش اي حد هيفهم اللي كنت  
بتقوله بس انا فهمته

- طيب كويس عشان أنا أحياناً مش بفهم نفسي والله وبلاقي نفسي بقول كلام  
غريب كده

- بس أنا هفهمك ولو خانتك الحروف والمعاني أنا دائماً هفهمك ياتيم!

قالتها زُلفي وهي تدخل أيضاً حين سمعت حديثهم

فرد عليها تيم قائلاً :

- ومين عندي غيرك يفهمني لو اتلغبط كياني

ثم نظر إليها وقال :

- اه صح انا نسيت اديكي الهدية بتاعتك!

- تيم! مفيش هدية عندي أعلى منك

ثم ضحك تيم وقال :

- عارف بس الهدية ديه هتعجبك تعالي

وخرجوا إلى قاعة الضيوف وطلب الجد أن يفرغو مساحة في المنتصف قليلاً

له ولزوجته حين قال :

- معلىش ياشباب أنا عايز منكم بس خدمة كده انا عايز أرقص مع مراتي

فمحتاجين مساحة صغيرة ينفع؟

وبعدها أمسك بـ زُلفي وقال :

- تسمح لي بالرقصة ديه يا جميلة!

فخجلت زُلفي وقالت :

- بس أحنا كبرنا على الحاجات ديه! نرقص اي بس؟

فرد عليها قائلاً :

- حياه بدون الرقص معكي ليس لها أي طعم بالنسبة لي!

فوافقت زُلفي' وراقصو وكانت أنظار الجميع إلي هذين الشخصين الكبار في السن والذي لم يقف السن في طريق سعادتهم أبداً حين قالت زُلفي' لـ تيم :

- شكراً ياتيم... شكراً على كل مرة حسستني إني لسة جميلة بالرغم من كل التعب اللي بيكون باين عليا ، شكراً أنك دائماً محسنتني أنك بتدعمني وبتحبني وإني دائماً في أمان وأنا معاك شكراً من قلبي

- بتشكريني علي اي؟ ده انا اللي محتاج أشكرك والله أنا حبيت الدنيا لأنك فيها وحببت الحياه لأنها معاكي... جميلة الدنيا وانا جنبك يا أطيب ركن في الزحمة

ووضعت زُلفي' رأسها على كتف تيم وتتهدت فقال تيم :

- هو في الحقيقة بقي أنا مكنش في نيتي إني أرقص أنا حبيت أحضنك أووي بس!

ثم نظرت له زُلفي' ومسحت علي خديه وقالت :

- وهو الناس بترقص غير لـ السبب ده!؟

وحين انتهو من الرقص قال تيم لـ زُلفي' :

- الهدية بتاعتك هتلاقيها في البلاكونة

فنظرت له زُلفي مستغربة وقالت :

- بس أحنا لسة خارجين من هناك؟ هندخل تاني

- يلا أدخلي وراكي اي يعني يلا

فدخلت زُلفي فرأت مريم واقفة أمام المنضدة الموضوعه وعليها كوبين من الشاي وهناك شمعة مضاءة وصندوق هدايا صغير علي المنضدة مغلف بطريقة مميزة وقالت مريم :

- أنا كده دوري هنا أنتهي هستأذن أنا بقى وأسيبكم مع بعض

وخرجت مريم وجلست زُلفي ومعها تيم وقالت :

- شاي بنعناع؟! أنت عارف أنا بحب اي كويس أووي

فرد عليها قائلاً :

- أنا حاولت اجيب حاجة كبيرة بس ملقتش غير اني أعزمك علي الشاي والباقي من عمري معاكي يا جميلة أكتوبر

ثم نظرت له زُلفي ولم تقل شيئاً وجلسوا يتحدثوا ويتمازحو

وكانت مريم تنظر إليهم من خلف الزجاج وتبتسم حين أدارت بظهرها وقالت  
كل سنة وأنتم بخير ( تيم و زُلفي )

**تمت بحمد الله**

### الخاتمة

والي هنا نكون قد وصلنا الي نهاية قصة زُلفي و تيم لتبدأ  
قصتكم أنتم مع شريك حياتكم ... أنا لن أكون حاضراً  
لأشدها ولكني أُصيكم بأن تكون قصتكم أجمل لأنكم  
تستحقون ... أراكم قريباً

**Amr Gmal Ahmed**

**<https://www.facebook.com/amr.gmal.1999>**